



15. 6. 2019 / BROJ 47

GIMNAZIJA LCI SA VILSONOVA





Sadržaj

DAN NEZAVISNOSTI

Svečana akademija povodom Dana nezavisnosti BiH	2
Priznanja i zahvalnice našim učenicima za učestvovanje u radionicama Muzeja "Alija Izetbegović"	2
Gostovanje na Grbavici	3
Mostovi koji spajaju	3

DAN ŠKOLE

71. rođendan naše Treće	4
-------------------------	---

DAN OTVORENIH VRATA

Zadivljujući uspjeh projekta "Naših ruku djela"	5
---	---

EYOF

Plamen mira ponovo u BiH	7
Intervju sa Harunom Kunovcem	9

DEŠAVANJA U ŠKOLI

Otvaranje STEM-kabineta	10
Američki ambasador želio upoznati učenike Treće	11
STEM Semafor	12
"Semafor" i u Berlinu	13
Kelly Witter u Trećoj	14
Nauka iza savršenog roštilja	14
Ispiti za njemačku jezičku diplomu	15
Dodjela DSD-diploma maturantima	15
Senzacija u Trećoj gimnaziji!	16
Bouldering – sport modernog doba	16
Koncert u Gradskoj vijećnici	18
Prva godina društveno korisnog učenja u Trećoj gimnaziji	20
Dan sporta	21
Konfučijev institut u Trećoj	22
Dan maternjeg jezika u Trećoj	23
"Nauka je ženskog roda"	23
Obilježavanje 21. marta	24
Dramom da ti kažem	25
Posjeta učenika iz Norveške Trećoj gimnaziji	26
Ugostili smo ambasadora Italije s učenicima	26
Opći roditeljski sastanak I razreda	27
USAID-ov program za bolje sutra	27
Donacija BH Telecoma od 4.000 KM	28
"Avengersi" + nauka	28
What's your story?	29
Dan zaljubljenih u Trećoj gimnaziji	29

TAKMIČENJA

Trudom i marljivim radom mogu se ostvariti svi ciljevi	30
Najbolji hor ikada!	30
Delaida Čoko druga u Kantonu iz francuskog jezika za treće razrede	30
Naši fizičari drugi u KS ekipno, a Igor Zarić prvi na Federalnom takmičenju	31
Salko Vladavić treći na prvom takmičenju iz maternjeg jezika i književnosti	32
Iman Bostandžić druga iz engleskog jezika u KS	32

World Scholar's Cup	32
Azra Alagić treća na kantonalnom takmičenju iz matematike	32
Veliki uspjesi na takmičenjima iz njemačkog jezika	33
Potrebno uvođenje služenja vojnog roka	33
Takmičili smo se i u pružanju prve pomoći	34
UNSA Ski kup 2019	34
Malik Kahvedžić drugi na Business Challengeu	34
Druga pratilja misice Balkana 2019.	35
Treća je šampion!	36
Ostavili smo trag na Ligi srednjoškolaca	37

UČESTVOVALI SMO...

Treća gimnazija - predstavnik Bosne i Hercegovine na Balkanskom omladinskom festivalu	38
Završna svečanost stvaralaštva učenika KS	39
"Od obale moje, do obale tvoje, sarajevski mostovi ponosno stoje"	39
"Za remizu" u Jelićevoj	40
Prirodnjaci i "Svijet koji nestaje"	40
Kaleidoskop teatra kroz objektiv mladih	41
Posjeta Muzeju ratnog djetinjstva	41
Rasplakala nas je "Žaba"	42
Posjeta učenika IV3 Muzeju Jevreja	42
Na otvorenju izložbe "Tri života Sarajevske hagade"	42
Sajam srednjih škola	43
Kako započeti karijeru programera?	43
Šta se to krije iza svih bankomata, transakcija, aplikacija...	43

STUDIJSKE POSJETE I IZLETI

Naša posjeta Istanbulu	44
Vijeće učenika u Mostaru	45
Naši izviđači na Mostarskim susretima 2019.	45
Slobodan dan u Blagaju	46
Hajdemo u planine!	46
Vozom u Mostar	46

ISPRAĆAMO U MIROVINU

Emira Hadžimuratović	47
Mara Matković	47
Salahudin Čolović	48
"Razglednice bh. gradova u doba austrougarske vladavine"	48

BILI SU I OSTALI NAŠ PONOS

Anel Tahirović: "U životu će biti uspona i padova, ali slijedite svoje snove"	49
Edin Đapo: "Učenje postaje smisleno tek kada počnemo učiti iz radoznalosti"	50

SRETNO, MATURANTI!

IV ₁	51
IV ₂	52
IV ₃	53
IV ₄	55
IV ₅	56
IV ₆	57
Oni su ponos generacije 2015 - 2019.	58
Veliko zvono	58

Svečana akademija povodom Dana nezavisnosti BiH

U srijedu, 27. februara 2019. održana je Svečana akademija povodom Dana nezavisnosti u amfiteatru naše Treće gimnazije. Program je započeo himnom Bosne i Hercegovine, a zatim su uslijedile pjesme hora i orkestra "Zemljo moja" i "Dragoj mojoj BiH", pod dirigentskom palicom profesorice Aide Kamenica. Nakon muzičkih tačaka prisjetili smo se kako je Bosna i Hercegovina stekla nezavisnost 1. marta 1992. i od tada je taj datum zlatnim slovima zapisan.



O tome kako je nezavisnost BiH prva priznala Bugarska, a potom i ostale države predstavili su nam članovi Historijske sekcije Ajna Đapo, I₄, Adin Čolić, II₃, i Dalila Lokvančić, II₃, s uvaženom profesoricom Emirom Hubjer. Poslušali smo i radove zaljubljenika u pisanu riječ, članove Literarne sekcije pod vodstvom profesora Džemaludina Poturovića. Pjesmom nas je pozdravila i talentirana Iman Pašić iz III₂. Otpjevala je pjesmu "S one strane Plive" u pratnji Irmana Muratovića iz III₃ i Edina Bajrića iz III₄. Vidjeli smo i prekrasan rad Selme Salman, I₂. Kao i svaki put, razveselio nas je i nastup školskog benda "Kontrapunkt". Kroz program su nas vodili izvanredni voditelji Elma Slabić i Kristijan Petrović iz III₃. Podrška je stigla i od članova Novinarsko-fotografske sekcije, zahvaljujući kojima sve ostaje dokumentirano.

Sretan Dan nezavisnosti!

*Tekst: Ajna Đapo, I₄, Amina Huko, IV₆
Foto: Amel Jašarević, I₄, Amina Huko, IV₆*

Priznanja i zahvalnice našim učenicima za učestvovanje u radionicama Muzeja "Alija Izetbegović"

Povodom obilježavanja Dana nezavisnosti BiH Muzej "Alija Izetbegović" organizirao je manifestaciju ovim povodom. Naši učenici su dobili priznanja i zahvalnice uz prigodne poklone za učestvovanje u interaktivnim radionicama povodom ove manifestacije. Zahvalnice su dodijeljene i direktorici Senadi Salihović za izuzetan doprinos i saradnju, te profesorici historije Sanidi Nuhanović. Od mnogobrojnih pristiglih likovnih i literarnih radova nagrađeni su Amina Dudo, Dalila Bublin, Irman Muratović i Emir Kljajić.



Gostovanje na Grbavici

Učenici Treće gimnazije su 26. februara učestvovali na centralnoj manifestaciji povodom Dana nezavisnosti Bosne i Hercegovine u Međunarodnom centru za djecu i omladinu Novo Sarajevo. Manifestaciju je organizirao Aktiv nastavnika historije, a tim povodom učenici osnovnih i srednjih škola su pisali eseje, literarne radove o temi "Ko sagradi most, dva će mjesta sastaviti, ko ga poruši - oba će izgubiti", što je ujedno naziv manifestacije. Prvo mjesto osvojio je rad učenika trećeg razreda Tvrтка-Jasmina Dželilovića.



Pod vođstvom profesorice Aide Kamenice naš hor i orkestar otvorili su manifestaciju. Nakon pjesme "Mojoj dragoj BiH" koju su izveli naši učenici, predstavile su se druge škole recitalima, predstavama i plesnim tačkama. Učenica Iman Pašić, uz pratnju hora i orkestra, izvela je pjesmu "Zemljo moja".

Zahvaljujući vrhunskoj izvedbi, uljepšali smo obilježavanje ovog značajnog datuma.

*Amra Koldžić, II₄
Foto: Esma Junuzović, II₄*

Mostovi koji spajaju

Teku svijetom mnoge rijeke.
One hitre, kao da zivotom udahnete,
teku i one spore, duboke i mrke
kao i one ledene, od zime ljute.

Idu preko rijeka mostovi.
Razne ruke ih digoše,
razne ih rušiše.
Te greađevine što vremenu se opiru...

Mostovima kroče ljudi,
ljudi kao male rijeke, bezbroj im lica,
bezbroj misli, bezbroj čudi.
Hode oni putima svojim.

Ali u ljudima je sudba prokleta,
usud taj strašni, da vječno hode
i nikad ne znaju kud ih vode.
Dok mostovi sve to pamte.

Jer mostovi ne stoje samo preko vode,
već i preko rijeka ljudske zlobe,
preko razlika i gnjeva,
pod suncem i gromom koji sijeva.

A ljudi su ti koji ih grade,
oni koji za dobro rade...
Oni što u sreću vjeruju i ljudski rod...
Ipak svi mi dijelimo isti nebeski svod.

Tvrтко-Jasmin Dželilović, III₆



71. rođendan naše Treće


Prva generacija učenika sjela je u klupe Treće gimnazije davne 1948. godine, a nakon nje brojne druge ostavljajući poseban trag i prosljeđujući informacije i savjete sljedećoj generaciji. U svakoj od njih rađala su se doživotna prijateljstva, ljubavi, uspomene i iskustva. Već 71 godinu u našu školu ulaze ambiciozni učenici, željni znanja, a iz nje izlazeiskusni i odrasli ljudi. Veoma smo ponosni što ovakvi učenici i danas pohađaju nastavu u našoj školi i što se svaka generacija trudi očuvati vrijednosti i unaprijediti ih.

Da bismo proslavili 71. godišnjicu naše škole, 22. marta 2019. godine u 10 sati održana je Svečana akademija u amfiteatru.



Školski hor i orkestar sa profesoricom Aidom Kamenicom otvorili su akademiju i prepoznatljivim nastupom oduševili publiku. Zatim je nastupila uvijek razigrana Plesna sekcija koja je novom koreografijom izmamila pljesak prisutnih. Na sceni je nastupila Recitatorska sekcija, pod vođstvom profesorice Elme Mašnić-Šikalo. Scenskim prikazom na originalan i kreativan način oživjeli su stihove Maka Dizdara.

A pošto nikad nije dosta muzike, učenica Iman Pašić, III₂, u pratnji gitare Edina Bajrića, III₄, i hora kojeg je činila publika, otpjevala je pjesmu "Nije htjela" Kemala Montena, a poslije nje je nastupila Lejla Fulurija iz III₂ u pratnji gitare Tee Dedić iz I₂ izvodeći pjesmu Dine Merlina "Kad si rekla da me voliš".



Nakon nastupa naših učenika direktorica je zahvalila svim uposlenicima, saradnicima i prijateljima škole, uručila im zahvalnice, te pozvala sve na Dan otvorenih vrata naše škole 27. aprila 2019. godine. Velikim aplauzom ispratili smo u mirovinu vrijednu radnicu škole Sabahetu Kutješ.



Naposlijetku je stigao i trenutak da se priznanja uruče i najuspješnijim učenicima školske 2018/2019. godine koji su se pokazali i dokazali u različitim aktivnostima škole, kao što su takmičenja, sekcije i projekti, te je time Svečana akademija i završila.

Amila Gabela, III₅



Zadivljujući uspjeh projekta “Naših ruku djela”

Početak ovog proljeća počela je priča o još jednom projektu u našoj školi. Osmu godinu u nizu, na Dan otvorenih vrata Treće gimnazije, veliki tim koji čine svi uposlenici škole, kao i naši vrijedni učenici, spremaju se za svima poznati projekat “Naših ruku djela”. Cilj ovog projekta je prikupljanje novčanih sredstava za odlazak svih naših drugara na maturalnu ekskurziju.

U petak, dan prije predstavljanja Treće gimnazije, mogao se osjetiti dašak atmosfere koja nas je očekivala sljedećeg dana. Naši društvenjaci su, zajedno sa usposlenicima, ispred škole postavljali binu, u hodnicima pravili novi raspored namještaja, a sve to je pratila muzika koja se mogla čuti iz amfiteatra, a koja je dolazila od naših raspjevanih i rasplesanih učenika koji su usavršavali posljednje detalje svog nastupa.

U subotu, 27. aprila, vrijeme nas nije zaustavilo u namjeri da na što bolji način pripremimo projekat i skupimo što više novca za prijatelje. Program koji se trebao izvoditi na bini, prebačen je u amfiteatar. Na bazaru su posjetioci mogli kupiti ono što učenici na štandovima nude: slatkiše, slanu hranu, napitke, zanimljive rukotvorine... Predstavnici Konfučijevog instituta su također imali svoj štand, na kojem su predstavili svoju državu i tradiciju, nudeći rukotvorine, tradicionalni čaj, a posjetioci su učili i kako nacrtati japanske simbole.

Pored bazara, na ovaj dan, škola je ponudila i zanimljiv sportski program koji uključuje takmičenja u odbojci, košarci i fudbalu, te boulderingu, kao i kulturno-zabavni program koji uključuje ples, pjesmu, igru i glumu. Kroz kulturno-zabavni program su nas vodili učenici trećih razreda Kristijan Petrović i Aida Hot. Vrijedi spomenuti i sve goste koji su učestvovali u ovom programu, a to su plesni studio “Just dance”, “Fresh generation”, KUD “Lola”, “Princess krofne”, Kike, Tarik Tanović, Saša Ristić, Merjema Alihodžić, OŠ “Grbavica II”, OŠ “Čamil Sijarić”...

Ovaj put smo predstavili i STEM-ekipu Treće gimnazije na čiji smo rad veoma ponosni.

Na našu sreću, podnevne sate smo, ipak, mogli provesti u školskom dvorištu. Širio se miris ćevapa pa nije ni bilo teško svu zabavu prenijeti vani.



realiziranom projektu. Sada se možemo zaslužno odmoriti, jer sa zadovoljstvom možemo reći da su rezultati projekta takvi da niti jedan učenik ne mora ostati kući, dok njegovi drugari idu na ekskurziju.

Dobro raspoloženje u našu školu je donijela i mnogobrojna mala raja koju je oraspoložio naš poznati gost Kike. Učenici završnog razreda osnovne škole su mogli su poblize upoznati našu, a možda i njihovu buduću, školu. Ove godine, kao i prethodnih, osnovci su imali priliku obići prostorije škole, a profesori su ih u nekoliko grupa proveli kroz pojedine učionice gdje su imali priliku vidjeti eksperimente, pričati sa predmetnim profesorima i sa učenicima o njihovim utiscima i iskustvima u školi.

Želimo zahvaliti svim sponzorima, usposlenicima i učenicima škole, gostima, kao i posjetioci na još jednom uspješno

Amila Gabela i Meliha Kasapović, III₅

Foto: Amina Huko (IV₆), Tajra Osmanagić (III₂), Nađa Osmanagić (II₁), Esmā Junuzović (II₂), Mirza Bakal (II₆), Ema Čatić (II₄), Amel Jašarević (I₄), Nura Džanko (I₁), Faris Balić (I₄), Tea Dedić (I₂), Zerina Osmić (IV₄), Ajdin Polić (IV₁)

DAN OTVORENIH VRATA



Plamen mira ponovo u BiH



Olimpijski plamen voli gorjeti u Sarajevu. Odrastali smo uz priču o Olimpijadi, ali malo nas je vjerovalo da ćemo takvo nešto i mi doživjeti. Još polažem onu naivnu nadu da će olimpijada još jednom doći u Sarajevo, ali ni Evropski olimpijski festival nije za mene bio ništa manje nevjerojatno iskustvo nego ZOI '84 mojim roditeljima. EYOF 2019, povjeren organizaciji Sarajevu i Istočnom Sarajevu, bio je najljepše iskustvo u mom životu. Kao volonter u sektoru za marketing imala sam priliku učestvovati u mnogim aspektima organizacije festivala. Naravno, kao što je i za očekivati, nisam jedina učenica Treće gimnazije koja je na neki način doprinijela realizaciji EYOF-a. Po ko zna koji put, naši gimnazijalci prepoznali su dobru priliku i potrudili se školu prikazati u što boljem svjetlu. Ne mogu vam reći broj naših gimnazijalaca koji su volontirali na festivalu od 10. do 15. februara, ali dovoljno je da vam kažem da sam na svakom borilištu prepoznala nekoliko lica.

Olimpijski festival mladih otvoren je spektakularnom ceremonijom na Olimpijskom stadionu "Asim Ferhatović Hase". Izvještaji kažu da je te nedjelje, uprkos hladnoći i vjetru, na Koševu bilo 25.000 posjetilaca. Sarajlijci, Bosanci i Hercegovci iz raznih dijelova naše domovine i stranci iz čitave Evrope uživali su u muzičkim izvedbama i plesovima. Baš tu, po prvi put, na scenu izlaze učenici Treće gimnazije, njih 24. Oni su, uz podršku profesorice Suade Krezić, od decembra 2018. godine sa ostalim sarajevskim srednjoškolicima vrijedno uvježbavali



koreografiju kojom će predstaviti svoj grad i domovinu. Naša Zerina Osmić, učenica IV₄, rekla je kako su pripreme i probe za veliku ceremoniju bile savršeno iskustvo za učesnike jer su dobili priliku da se bolje upoznaju i druže skoro svaki dan dva mjeseca. Lijepo iskustvo je prijateljstvo koje su stekli. Već, kažu, planiraju nekoliko zajedničkih izleta.

Njena kolegica Arnela Obralića iz IV₂ kaže kako na dan otvaranja nisu osjetili ni hladnoću. Otkrila nam je i njihove osjećaje i tokom nastupa: "Na nastupu nije bilo treme jer je prevladavao osjećaj ponosa. Zajednički i jedinstveno uspjeli smo prikazati trud koji smo uložili u naš nastup pripreman prethodna dva mjeseca. Posebno

u dijelu kada se cijeli slet u polukrug razdvaja i nastupa hip hop grupa Plesne sekcije i atletičarska grupa, među kojima je bila i učenica iz naše škole. Veliki je uspjeh što smo nastupili u sletu 300 srednjoškolaca, koji se u jednom momentu razdvaja te desetak nas dominira stadionom koji prati ogroman broj gledalaca širom svijeta."

Osjećaj ponosa, o kojem je Arnela govorila, spomenula je i Nejla Selimović, II₅: "Onaj osjećaj ponosa i zadovoljstva koji sam osjetila za vrijeme nastupa i poslije njega definitivno nikad neću zaboraviti."



Osjetila sam taj ponos i ja, iako nisam bila među 24 plesača iz Treće gimnazije. Ima nešto u pogledu hiljada veselih ljudi okupljenih na jednom mjestu što čovjeka ne može ostaviti ravnodušnim. Lagala bih kad bih rekla da tu noć, iako euforična i radosna kao nikad u životu, nisam zaplakala. Pustila sam suzu kada sam se, dijelivši zastavice Bosne i Hercegovine, popela na vrh sjeverne tribine baš kada je odbrojavanje počelo. Zaplakala sam i kada je zapaljen plamen mira i kada sam obučena u veliku nasmijanu grupu plesala sa volonterima iz Novog Sada.

I Zerina i Arnela i Nejla spomenule su koliko im je neobično bilo kada su shvatile da su probe završile i da više neće biti smrzavanja na Koševu. Sutradan su plesači iz Treće gimnazije štafetu predali prijateljima volonterima na EYOF-u.



Adil Tutun, I₄, jedan je od njih. On je "radno vrijeme" provodio u Zetri prateći hokejaške utakmice. I njemu je, kao i većini učenika, ovo bilo prvo volontersko iskustvo, a ako mu se ukaže slična prilika, objeručke će je prihvatiti. Drago mu je, kako kaže, što je imao priliku upoznati mlade sportiste, ali i naučiti nešto više o hokeju. "Najzanimljivije mi je bilo gledati finalnu utakmicu, između momčadi Češke i Bjelorusije, u kojem su Bjelorusi povelili, ali u konačnici izgubili od Češke, favorita." Dok je Adil u Zetri pratio hokej, Aldin Godinjak, iz I₂, boravio je u atletskom selu, hotelima Hills i Hollywood. Tu je, kaže, imao priliku upoznati mnoge sportiste. Moram priznati da sam bila ljubomorna na volontere u AVL-u jer su imali priliku družiti se sa sportistima u opuštenoj atmosferi, daleko od stresa na borilištima.

Ja sam sedmicu volontiranja na EYOF-u provela uglavnom na Bjelašnici prateći takmičenja u snoubordu. Snoubord, sport o kome nisam mnogo znala, oduševio me. Bilo je nevjerojatno interesantno



posmatrati takmičare kako izvode razne akrobacije o kojima se neki ne bi usudili ni razmišljati. Nakon dana provedenog na čistom zraku, vratila bih se u hotel Hills. Nije nam bilo važno ni u kom si sektoru ni šta ti je "u opisu posla", svi smo pomagali svima, radili smo sve. Možda li se nešto u čemu smo toliko uživali uopće nazvati radom?



Grupica učenika se pobrinula i da svoju školu predstave na platou Skenderije u utorak, 12. februara 2019. Naša maturantkinja Amina Huko govorila je o misiji i viziji škole, te uvjetima rada i postignutim rezultatima. Održano je i mini predavanje o Zimskim olimpijskim igrama 1984. i Evropskom olimpijskom festivalu mladih 2019. Učenice su na radionicama pokazale izradu nakita, a školski bend "Kontrapunkt" je otvorio i zatvorio ovo predstavljanje. Zahvaljujemo profesorici Sanidi Nuhanović i socijalnoj radnici Ameli Muftić-Arapović bez kojih ovo predstavljanje ne bi bilo uspješno.

Posljednjeg dana EYOF-a predsjednici III i IV razreda, grupa učenika Treće gimnazije koja je učestvovala na ceremoniji otvaranja i učenici koji su nas predstavljali na platou Skenderije, zajedno sa socijalnom radnicom Amelom Muftić-Arapović, profesoricama Suadom Krezić i Zinaidom Fejzić i roditeljkom Sabinom Šunjić, posjetili su Bjelašnicu i prisustvovali takmičenju u paralelnom slalomu u kojem je učestvovao i naš Harun Kunovac. Ekipa učenika učestvovala je u takmičenju povlačenja konopca u kojem su pobijedili. Pobjednička euforija još nije bila završila, a uslijedila je nova. U skakanju u vrećama u fotofinišu pobijedila je Arnela Obralija.

Hvala svima koji su nam omogućili kreiranje "priča za unuke".

Edna Šunjić, II₅, Arnela Obralija, IV₂

Veoma sam sretna i ponosna što sam imala priliku da se družim i budem učesnica svečane ceremonije otvaranja Evropskog omladinskog olimpijskog festivala (EYOF).

Uz podršku profesorice Suade Krezić i mojih drugara, smijeh i druženje, željela sam savladati koreografiju i biti što bolja kako bih uspješno pratila svoje vršnjake. Moji školski drugari sa kojima sam provodila najljepše trenutke su: Ajna, Almedina, Lamija, Zerina, Erna, Nadja, Nejla, Softa, Dula, Faruk, Tarik, Aida, Maria, Hana H, Hana T, Andrea, Kristijan, Dalila, Dina, Lejla, Arnela i Haris.

Nešto najljepše što sam doživjela je izvanredan osjećaj prilikom izlaska na stadion "Asim Ferhatović Hase" i ogromna podrška publike. Svi smo bili sretni i ponosni što imamo čast biti učesnici ceremonije, a ja sam bila posebno sretna što sam u dijelu ceremonije "We create together" imala priliku pozdraviti publiku.

Ovo je jedan od ljepših događaja u mom životu, možda i najljepši do sada i želim da svi učenici budu sretni kao što sam bila ja na ovoj ceremoniji otvaranja EYOF-a.

Voli vas Edna Šunjić!

Intervju sa Harunom Kunovcem

Harun Kunovac, učenik III₄ razreda naše škole, jedan je od mlađih članova skijaške reprezentacije Bosne i Hercegovine. Već dugi niz godina ostvaruje velike uspjehe za našu reprezentaciju, a predstavljao nas je i na Evropskom olimpijskom festivalu mladih u Sarajevu.



Kako si se počeo baviti ovim sportom?

Oduvijek sam volio zimu i snijeg. Roditelji su me učlanili u školu skijanja sa šest godina. Ubrzo se rodila ljubav za tim sportom i danas ne bi mogao zamisliti svoj život bez skijanja.

Koja ti je najveća motivacija?

Najveća motivacija mi je učestvovanje na Zimskim olimpijskim igrama i san mi je da jednog dana predstavjam državu na najvećem sportskom događaju.

S obzirom na to da skijanje nije sport koji se u Sarajevu može trenirati tokom cijele godine, kako izgledaju tvoji treninzi u ljetnom periodu?

U ljetnom periodu imam puno kondicionih treninga kako bih spreman dočekao sljedeću sezonu. Također, odlazim u Austriju kako bih trenirao na snijegu.

Kakav je bio osjećaj predstavljati Bosnu i Hercegovinu na EYOF-u?

Predstavljanje BiH na EYOF-u za mene je bilo posebno i nezaboravno iskustvo i velika čast pogotovo zbog toga što se održavalo upravo u mom gradu pred domaćom publikom.

Uz nastup na EYOF-u, na kojim većim takmičenjima si učestvovao?

Mogu se pohvaliti i mnogim internacionalnim takmičenjima u Evropi među kojima su i najveća takmičenja za djecu u Italiji, Austriji...

Ko je tvoj najveći uzor i zašto?

Uzor u ovom sportu mi je trenutno najbolji skijaš svijeta Marcel Hirscher zbog svih rekorda i podviga koje je postigao.

Skijanje kao i svaki drugi sport zahtijeva mnogo odricanja. Je li se to odrazilo na tvoj život?

Svakako da zahtijeva dosta odricanja, ali to je sastavni dio svakog sporta i ne predstavlja mi problem jer uspijevam nekako uskladiti obaveze iz privatnog života sa treninzima.

Koja je tvoja najdraža disciplina?

Najdraža disciplina mi je slalom u kojoj i postižem najbolje rezultate.

Koja ti je najljepša uspomena u ovom sportu?

Najljepša uspomena za mene je upravo učestvovanje na proteklom EYOF-u jer je to najveće takmičenje u dosadašnjoj karijeri.

Koji trenutak ili situaciju sa staze ćeš pamtili do kraja života?

Teško je izdvojiti samo jednu situaciju zbog toga što ih je bilo dosta lijepih, smiješnih, ali nekada i tužnih. Pamtit ću trke koje su mi donijele medalje i dobre rezultate, ali najviše prvu trku kao član reprezentacije Bosne i Hercegovine.

Na kojoj stazi/planini najviše voliš da skijaš?

Najviše volim skijati na Bjelašnici, jer je to skijalište na kojem sam i započeo takmičarsku karijeru.

Da možeš, šta bi uradio kako bi poboljšao kvalitet skijanja u BiH?

Za razvoj i poboljšanje skijanja u BiH definitivno je potrebno da država mnogo više ulaže u skijališta, ali i sportiste. Kada bih imao priliku, potrudio bih se da to promijenim jer planine oko Sarajeva imaju veliki potencijal za razvoj skijanja.

Koji bi savjet dao djetetu koje tek uči skijati a ima san postati uspješan sportista?

Savjet koji bih mu dao, a koji sam i ja nekada dobio i prihvatio, bio bi da vrijedno radi i nikad ne odustaje od snova.

Zahvaljujemo Harunu i od srca mu želimo mnogo sreće i uspjeha u nastavku karijere.

Huko Amina, IV₆




Otvaranje STEM-kabineta

Na 71. rođendan Treće gimnazije, 22. marta 2019. godine, svečano je otvoren STEM-kabinet. Naša gimnazija je tako postala jedna od pet srednjih škola u Bosni i Hercegovini i jedina u Kantonu Sarajevo opremljena za STEM-nastavu. Ovim povodom su učenici II₅, sa profesoricama Alisom Ramić, Melihom Salihović i Aidom Ražanicom, predstavili projekt na kojem su radili na časovima fizike, biologije i informatike. Naime, učenici su imali priliku da ovih nekoliko časova igraju ulogu bioinženjera i istražuju



proces izrade zamjenskog srčanog zaliska. Na časovima biologije su upoznati o građi srca i samih srčanih zaliska. Zatim su na časovima fizike istraživali materijale od kojih se zamjenski zalisci



prave, ali i one od kojih bi mogli napraviti funkcionalan model zaliska. Izmjerali su elastičnost raznih materijala, a potom na času informatike pomoću Excelovih grafika izračunali Youngov modul elastičnosti. Ove podatke su iskoristili kako bi napravili što realističniji model srčanog zaliska.

Rad su predstavili našim profesorima, predstavnicima organizacije "Save the children", pomoćnici ministrice za obrazovanje Kantona Sarajevo Lamiji Husić, te drugim prisutnim gostima.

Zahvaljujemo svima koji su podržali naše učenike u ovom projektu i prisustvovali otvaranju STEM-kabineta Treće gimnazije.

Emma Selimović, II₅



Američki ambasador želio upoznati učenike Treće

Uvijek su mi govorili, radi dobro i neko će to vidjeti. To je samo jedan od mnogih načina kako da opišemo dva dana provedena u Mostaru.

Kao model-škola projekta STEM, u okviru ENABLE BiH, dobili smo poziv na dvodnevnu konferenciju projekta "Unapređenje osnovnog učenja i obrazovanja u Bosni i Hercegovini / Enhancing And Advancing Basic Learning And Education In Bosnia And Herzegovina – ENABLE BiH" podržane od Američke agencije za međunarodni razvoj (USAID). Konferencija je održana u Mostaru, u prostoru Tehnološkog parka INTERA.



Prvi dan konferencije imali smo priliku slušati stručnjake iz obrazovanja i steći nova znanja ne samo u vezi sa projektom STEM, već obrazovanjem u svijetu. Drugi dan konferencije dobili smo priliku izložiti projekte koje smo radili u školi. Treća Gimnazija je bila pozvana kao jedina škola koja je radila dva projekta u okviru STEM-nastave. Prvi projekat zvao se Srčani zalisci, a drugi projekat je bio Semafor. Imali smo priliku svim učesnicima konferencije pokazati naš film koji smo snimili za projekat Semafor. Nakon projekcije filma učesnici su zaključili da je ovaj projekat otišao i korak dalje, dodata je i komponenta umjetnosti A – Art. Možemo reći da smo predstavili jedan projekat iz STEM-nastave i drugi iz STEAM-nastave.

Nakon projekcije filma profesori i učenici otišli su za svoje štandove kako bi predstavili projekte pomoću modela koje su izradili. Zainteresovanost za naše projekte bila je velika. Posebna gošća bila je Shanley Pinchotti, direktorica ureda za demokratizaciju pri Misiji USAID-a u BiH koja nam je prenijela želju američkog ambasadora Erica Nelsona da razgovara sa ekipom iz Treće gimnazije. Shvatili



smo to kao veliku čast. Nakon završene konferencije u prostorije Tehnološkog parka INTERA došao je američki ambasador Eric Nelson sa pratnjom. Zahvalio je učenicima i profesorima na našem inovativnom radu. Delgacija SAD-a bila je posebno oduševljena vidjevši da na konferenciji učestvujemo sa dva projekta.

Treću gimnaziju na konferenciji predstavljali su profesori Meliha Salihović, Amra Čolić, Alisa Ramić i Mevludin Maličević, te učenici Zerina Osmić, Nedim Numanović, Ervin Golubović, Elvir Vlahovljak, Nađa Viđen i Ensar Korjenić.

Mevludin Maličević, profesor

STEM Semafor

I velika putovanja počinju malim korakom, tako bi se mogao započeti ovaj razgovor sa našim učenicima i profesorom koji su radili na projektu STEM Semafora, misleći da rade mali projekat koji je na kraju otišao na evropske razmjere i opravdao početnu izreku.

Na samo početku razgovora sa našim učenicima željeli smo da još jednom za nas ispričaju kako su došli do ideje za ovaj projekat.

Na času fizike sa profesorom Mevludinom Maličević redovno razgovaramo o problemima sa kojima se susrećemo svakodnevno. Tako se nedavno dosta učenika izjasnilo kako imaju poteškoće u saobraćaju sa zelenim za pješake dok prelaze pješački prelaz. Pošto smo mi po metalitetu samokritični prvo što nam padne



napamet jeste to da je do nas, da ne idemo dovoljno brzo, da smo mi krivi... profesor Maličević je prišao učenicima sa rečenicom: "Ajd' da ispitamo do koga je?" I tako je začeta ta ideja da krenemo u realizaciju datog projekta.

Da li nama možete reći da li su svi učenici učestvovali u projektu?

Za realizaciju ovog projekta bilo je potrebno odabarati učenike koji imaju afiniteta prema programiranju, montaži i snimanju, elektronici, sportu i fotografiji. Tako da se ekipa 'sama' sastavila



od četiri učenika koji su zadovoljavali te kriterije, ostali učenici u razredu također su mogli dati svoj doprinos u realizaciji projekta.

Iduće pitanje koje se nameće je da nastavite sa opisom realizacije projekta.

Kada smo jasno postavili tezu za projekat i odabarali ekipu koja će nositi glavninu projekta, logično je bilo da krenemo u realizaciju istog. Prvo što smo uradili bio je izlazak na teren. Nasumično smo izabrali tri raskrsnice u gradu Sarajevu koje su u tri različite općine. Semafor na pješačkom prelazu preko ulice Zmaja od Bosne, općina Novo Sarajevo. Semafor na pješačkom prelazu ulice Maršala Tita, općina Centar. Semafor na pješačkom prelazu ulice Ante Babića, općina Novi Grad. Pratili smo situaciju sa prekršajima i utvrdili smo



da svake minute 5 pješaka pređe ulicu za vrijeme crvenog svjetla. Čine greške kako bi stigli preći ulicu, ugrožavajući sebe i druge učesnike u saobraćaju. Također smo mjerili dužine sva tri pješačka prelaza, trajanje zelenog svjetla za pješake i trajanje crvenog svjetla za automobile.

Vratili smo se u kabinet i proračunima došli do zaključka da nije do pješaka da ni jednom od tri pješačka prelaza nije zadovoljeni standardi za pješake da zeleno svjetlo za pješake traje prekratko.

Koji je bio idući korak? Imali ste tezu za projekat, a odgovor na to šta dalje?

Otišli smo u STEM kabinet i krenuli u realizaciju našeg rješenja tako što smo krenuli da radimo maketu raskrsnice koja će biti umanjena 150 puta u odnosu na najveću raskrsnicu koju smo mjerili. Naš kolega Elvir Vlahovljak je vješto napravio program, a Nedim Numanović i Zerina Osmić su sastavili maketu raskrsnice. Kada smo vidjeli da imamo sve elemente za prezentaciju našeg rješenja odlučili smo da naš projekat građanima Kantona Sarajevo prezentiramo pomoću video klipa. Taj dio posla uradio je kolega Ervin Golubović. Pošto dužina trajanja zelenog svijetla za pješake nije bila samo naš problem nego problem svakog građanina, u realizaciji videa, pomoć su nam pružili i naši prijatelji Fahrudin Čatović, Edna Šunjić i Jasminka Proho kojima se ovom prilikom zahvaljujemo. Učenici su projekat javno prezentirali a rješenja ostavili za nadležne koji bi ista mogli da realizuju.



Nekoliko sati nakon javnog objavljivanja videa, dobili smo mnogo poziva od TV i radio kuća, ministara i firmi zaduženih za saobraćaj, i mnogih drugih, među kojima je najveći korak na početku napravila kompanija WeAreDevelopers i pozvala nas na najveći evropski, a ujedno i svjetski kongres developera u Berlinu. Za realizaciju ovog projekta pomoć je pružio BS Telekom Sarajevo, tako što su odlučili biti sponzor putovanja, da našim učenicima boravak u

“Semafor” i u Berlinu

Prepoznavši aktivnost naših učenika koji su radili projekt STEM Semafor, IT-kompanije i organizacije odlučile su nagraditi naše učenike tako što će im sponzorirati odlazak na WeAreDevelopers Svjetski kongres u Berlinu, koji se održavao 6. i 7. juna 2019. godine. Zahvaljujući BS Telekom Solutionsu d.o.o., WeAreDevelopersu – Sarajevo i Save the Childrenu naši učenici su učestvovali na ovom veoma važnom skupu IT-stručnjaka.

Učenici su se vratili sa Kongresa oduševljeni jer im se pružila prilika da steknu nova znanja

zahvaljujući razgovorima najvećim stručnjacima iz IT sektora, vidjevši inovacije i simulacije i ostvarivši prve poslovne razgovore.



Berlinu bude što ugodniji svoj doprinos dali su i Save the Children odlučivši da nam plate užine dok smo u Berlinu.

Projekat je sam imao toliki odjek u javnost da je naša ekipa ima preko 20 javnih nastupa. U nastavku navodimo vam neke: TV1 - snimanje priloga (u školi), Aljazeera - snimanje priloga (u školi), TVSA - Dobre vibracije (uživo program), TVSA - dnevnik prilog, N1 – gostovanje (uzivo program), BHT1 - Euroimpuls (emisija), Nova TV – gostovanje (uživo program), RSG radio – intervju (profesor), Kalman radio – gostovanje (emisija uživo), ASK radio Ildiza – gostovanje u emisiji Dobri ljudi (uživo emisija), klix.ba – tri članka, radiosarajevo.ba - intevju za portal, Oslobođenje - snimanje i intevju za novine, gosotvanje kod ministra Adnana Šteta, gostovanje kod WeAreDeveloper, JP Sarajevo, sastanak sa BS telecom, sastanak sa američkim ambasadorom, Mostar kongres, Nova tv drugi put, FTV - U zmajevom gnijezdu, Udri Muški Radio otvorena mreža, Berlin Kongres, Dani BHAAAS-a u BiH.

Nakon svega ovoga i više smo nego ponosni na naše maturante i nadamo se, zajedno sa njima, primjeni njihovog rješenja. Hvala im što su dio naše zajednice i što žele da rade na poboljšanju našeg grada. Na kraju oni kažu da im nije bilo teško raditi na projektu sve dok imaju dobro okruženje oko sebe. Nadamo se da će i dalje nastaviti raditi i živjeti u dobrom okruženju.



Kelly Witter u Trećoj

Kelly Witter, članica Američkog vijeća za zaštitu okoliša, u STEM učionici 13. marta 2019. održala je predavanje o zagađenosti zraka i racionalnom korištenju struje. Predavanju su prisustvovali učenici, predmetni profesori uključeni u projekt STEM, te školska uprava.



Kelly Witter počela je predavanje ukazujući na globalne probleme i istakla da je najveći zagađen zrak. Detaljnije je objasnila kako zagađen zrak utječe na naš respiratorni i kardiovaskularni sistem, te kako se možemo zaštititi od zagađenog zraka i doprinijeti smanjenju zagađenja.

Racionalno korištenje električne energije bila je naredna tema. Razgovarali smo o obnovljivim izvorima energije, koji je najefikasniji način proizvodnje i koliko struje troše naši kućanski aparati. Učenici su imali priliku izmjeriti kapacitet pluća i sastaviti uređaj za mjerenje zagađenosti zraka, a nakon časa su postavljali pitanja.

Sigurni smo da je ovo predavanje bilo produktivno i da su učenici obogatili znanje o zagađenosti okoliša.

Amina Huko, IV₆

Nauka iza savršenog roštilja

U četvrtak, 25. aprila 2019. godine, učenici III₄ sa profesoricama fizike i hemije Alisom Ramić i Edinom Hodžić realizirali su projekt Nauka iza savršenog roštilja.



Pod parolom "Nauka je svuda oko nas" III₄ je učenicima prvog i trećeg razreda, upravi i profesorima objasnio fiziku, biologiju i hemiju savršenog roštilja. Pojasnili su biološki i hemijski sastav sirovog i pečenog mesa, zašto meso mijenja boju tokom pečenja, kako se prenosi toplota, kako vrsta roštilja utječe na pečenje, te kako se zaštititi i smanjiti utjecaj kancerogenih materija tokom roštiljanja. Ono što su učenici istražili i naučili primijenili su i ispekli roštilj s više vrsta mesa, te počastili učesnike i publiku.

Alisa Ramić, profesorica

Ispiti za njemačku jezičku diplomu

Nakon više od 20 sati usmenih ispita, podijeljenih u četiri dana, 39 učenica i učenika II₂ i trećih razreda DSD-programa odličnim uspjehom su položili usmeni dio DSD I ispita. Ispitne komisije su sačinjavali Thomas Polland, u ime Centrale za školstvo u inozemstvu Savezne Republike Njemačke, i naše profesorice njemačkog jezika Sanela Omeragić i Džemilamna Džananović. Bili su oduševljeni raznovrsnim i zanimljivim temama, vrlo kvalitetnim prezentacijama kojima su učenici na usmenom ispitu predstavili istraživanja.



Usmenim ispitima prethodio je i pisani dio ispita koji je realiziran 14. marta 2019. godine.

Čestitamo od srca!

Aktiv profesora njemačkog jezika

Dodjela DSD-diploma maturantima

U ponedjeljak, 13. maja 2019. u amfiteatru Treće gimnazije upriličena je ceremonija dodjele DSD-diploma maturantima. Došao je i taj dugo iščekivan dan još od predaje papira za upis u srednju školu. Svečanost je započela obraćanjem profesorice njemačkog jezika Emire Hadžimuratović i direktorice Senade Salihović, koje su pripremile i poslastice za sve nas. Vrijedni četverogodišnji rad krunisan je izvanrednim rezultatima. Devetnaest učenika položilo je C1, a dva učenika B2 nivo. Prema analizi, rezultati testiranja nikada nisu bili



bolji. Prolaznost sva tri dijela pismenog ispita je 100% , što je najbolji pokazatelj stečenih jezičkih vještina i zrelosti. Ovom prilikom zahvaljujemo profesoricama Aktiva njemačkog jezika na odličnom podučavanju i doprinosu u organizaciji ispita. Posebne zahvale dugujemo našoj najdražoj profesorici i razrednici Brkić-Delalić Šejli koja je umnogome doprinijela ovakvom uspjehu. Inovativnim metodama predavanja i organiziranjem raznih projekata pomogla nam je dosegnuti visoki nivo znanja, ali i ljudskosti. Novembarska ispitna euforija zblížila nas je sa izvrsnom profesoricom Emirom Hadžimuratović, koja je omogućila uvođenje DSD-programa u Treću gimnaziju. Profesorica je izdvojila mnoge sate u cilju razjašnjavanja svih nedoumica i organizirala nam dodatne časove pripreme.

Nadamo se da će i naredne generacije prepoznati značaj DSD-diploma koje mogu dobiti u okviru redovne nastave. Veliko hvala profesoricama, Upravi škole i našoj Trećoj!

Čestitke svim učenicima!

Abela Rastoder, IV₂

Senzacija u Trećoj gimnaziji!

Ministrica za obrazovanje, nauku i mlade Kantona Sarajevo mr. Zineta Bogunić, bivši ministar dr. Elvir Kazazović i gospodin Muhamed Gafić 22. januara 2019. svečano su otvorili vještačku stijenu za sportsko penjanje u sali Treće gimnazije Sarajevo, koja učenicima pruža mogućnosti za razvijanje motoričkih sposobnosti, snage, izdržljivosti...

Direktorica škole Senada Salihović pozdravila je prisutne i istakla je poseban doprinos bivšeg ministra za obrazovanje, nauku i mlade KS prof. dr. Elvira Kazazovića, koji je prepoznao kvalitet projekta i pomogao pri donošenju odluke za sufinansiranje i postavljanju ove stijene u sali Treće gimnazije, kao i profesorici Suadi Krezić i Sarajevskoj školi alpinizma - idejnim tvorcima ovog projekta. Realizacijom ovog projekta



poboljšat će se kvalitet nastave na časovima sporta te omogućiti našim učenicima predstavljanje i u ovoj sportskoj aktivnosti.

Direktorica je zahvalila Lamiji Husić i Arneli Trešnjo iz Ministarstva za obrazovanje, nauku i mlade Kantona Sarajevo, predstavnicima Školskog odbora, Vijeću roditelja, Vijeću učenika, uposlenicima Treće gimnazije, predstavnicima UNICEF-a, Srednjoj školi "28. juni" iz Istočnog Novog Sarajeva, TVSA, roditeljki Sabini Šunjić i brojnim gostima koji su prisustvom podržali i uveličali ovaj značajan događaj.

Ismeta Trepalovac, profesorica

Foto: Amina Huko, Amel Jašarević, Kerim Kapetanović, Ajdin Sadžak, Selma Salman



Bouldering – sport modernog doba

Bouldering je penjanje po malim stijenama, obično od 2 do 5 metara visine i predstavlja dobru pripremu za alpinističke uspone. Naša vještačka stijena u sportskoj sali visine je 4, a širine 12 metara. Uz stijenu, na podu su strunjače koje amortiziraju pad. Bouldering je siguran sport sa mnogo manje povreda nego u drugim sportovima ako se pridržavamo pravila ponašanja. Tri tačke oslonca, dobra koncentracija, strpljivost i sposobnost iznalaženja rješenja u kretanju po stijeni osnovni su postulati ovoga sporta. Paziti na sebe i druge oko sebe, da nikoga nema ispod penjača i da svaki pokret bude dobro odmjeren, koraci su koje su učenici svih odjeljenja prvih razreda naučili na časovima obuke penjanja.

Obuka je trajala mjesec sa instruktorima Sarajevske škole alpinizma. Održana su po dva časa teoretske pripreme i po dva časa praktičnog upoznavanja sa penjanjem na vještačkoj stijeni u svakom odjeljenju. Saradnja sa Sarajevskom Školom Alpinizma krenula je još mnogo prije nego smo se udružili oko ovog projekta. Prije 10-ak godina jedno odjeljenje prvih razreda provelo je vikend na planini Visočici učeći osnove alpinizma upravo s njima. A onda se rodila ideja da napišemo projekt i pokušamo i u sali Treće gimnazije imati vještačku stijenu i ponuditi učenicima nešto novo. I uspjelo je! Vjerujemo da će sve više škola u Kantonu Sarajevo biti opremljeno stijenama za penjanje, a naša buduća misija je pisanje projekta za podizanje stijene do visine od 9 m.

Suada Krezić, profesorica



Šta Vas je podstaklo na realizaciju ovog projekta?

Ministarstvo obrazovanja, nauke i mladih KS prepoznalo je našu namjeru da želimo nešto novo. Kontaktirala sam Sarajevsku školu alpinizma koji su nas rado podržali i zajedno smo došli do finansijskih sredstava.

Uz veliki entuzijazam, ko Vam je bio dodatna podrška?

Članovi Sarajevske škole alpinizma voljeli bi da se ova aktivnost kod nas održi, nastavi i unapređuje. S druge strane, uvijek imam podršku direktorice, koja je inače vrlo otvorena za sve ideje.

Kako su reagirali učenici i profesori prilikom realizacij ovakvog projekta u Trećoj gimnaziji?

Svima je to bilo nešto novo. Idemo polako, jer je riječ o sportu koji zahtijeva dobru koncentraciju i ako nemamo odličan fokus u tome što radimo, možemo se lako povrijediti. A moj prvi utisak je da im se dopada.

Možete li nam nešto reći o sportskom penjanju kao disciplini?

Postoji razlika između alpinizma i sportskog penjanja. U našoj školi imamo učenika četvrtog razreda Amara Hasečića koji se dugo bavi time i Andreu Sparavalo u trećem i oboje su izuzetni i vrsni bolderi. Postoji razlika - sportsko penjanje možemo ovdje raditi i organizirati male turnire. Tako će biti i na Danu otvorenih vrata kada će suditi Andrea i Amar, a instruktori Sarajevske škole alpinizma će postaviti zadatke. Riječ je o sportu u kojem moramo paziti na svaki korak. Uvijek moraju biti tri tačke oslonca. Vrlo osjetljivo, pomalo i opasno, ali vrlo sigurno ako se igra po pravilima.

Koji su planovi Treće gimnazije u vezi sa ovim sportom?

Treba nam još jedan dio stijene koji ide vertikalno uvis, sa možda nekim izbočenjima što će biti malo kompleksnije za savladavanje kako bismo mogli organizirati još veće projekte i neka takmičenja na višem nivou.

Ajna Đapo, I₄

Koncert u Gradskoj vijećnici

U Gradskoj vijećnici u Sarajevu 27. marta 2019. godine upriličen je koncert internacionalne saradnje između Treće gimnazije i Srednje privatne škole "Kinjo Gakuin Glee Club" iz Japana. Ceremonija je otvorena obraćanjem dogradonačelnika Ivica Šarića, ambasadora Japana i direktorice škole Senade Salihović. Saradnja je ostvarena na prijedlog gospodina Mirze Želje, a koji je uprava škole entuzijastično prihvatila. Obrazovna ustanova Kinjo je u okviru evropske turneje tražila partner-školu iz Bosne i Hercegovine, te sa ponosom možemo reći da je Trećoj gimnaziji pripala ova čast za razvijanje interkulturalnih odnosa.


Škola iz Japana osnovana je 1889. godine, a u svom sklopu podrazumijeva i univerzitet. Posebnu pažnju posvećuju muzičkom obrazovanju, a nastava je organizirana na engleskom jeziku. Hor "Kinjo Glee Club" godinama bilježi značajne uspjehe na takmičenjima, a izvrsni koncerti su humanitarnog karaktera i često osmišljeni u pravcu kulturološke razmjene kroz muziku. Do sada su kooperirali sa Kinom, Poljskom, Njemačkom, Austrijom, Mađarskom te brojnim drugim zemljama svijeta. Hor i orkestar Treće gimnazije pod vođstvom profesorice Aide Kamenica, bez koje ništa od ovoga ne bi bilo moguće, mjesecima se pripremao za ovaj nesvakidašnji događaj. Koncert je otvorila naša muzička sekcija pjesmom "Ave Marija" te je uslijedio višesatni program sa izvedbom tradicionalnih bosanskohercegovačkih i japanskih, ali i stranih pjesama.



Svaka tačka popraćena je i odgovarajućom scenskom koreografijom. Japansku pjesmu "Hanawa-saku", koja je posvećena žrtvama teškog zemljotresa i cunamija u regiji Tohoku, naši učenici izveli su zajedno sa Japancima. Zatim je i hor "Kinjo" pjevao sa nama na bosanskom jeziku.

Samom koncertu prethodilo je druženje u zgradi škole, gdje su se učenici međusobno upoznavali i naučili praviti origami. Zahvaljujemo na organizaciji ovakvog događaja, a Treća gimnazija otvara vrata svim narednim saradnjama.

Abela Rastoder, IV₂



Prva godina društveno korisnog učenja u Trećoj gimnaziji

Iako se na početku realiziranja projekta činilo kao dodatno opterećenje za učenike i nastavnike, nakon niza predivnih aktivnosti u kojima smo učestvovali, sa zadovoljstvom ističemo da smo ostvarili planirano i realizirali cilj ovog projekta.

Raznim humanitarnim akcijama, pomaganjem u narodnoj kuhinji i drugim sličnim organizacijama, održavanjem čistoće, druženjem sa djecom sa posebnim potrebama, druženjem sa djecom bez roditelja, obilježavanjem važnih datuma, doniranjem kose, organiziranjem humanitarne plesne revije, organiziranjem Dana sporta, saradnjom sa sarajevskom školom alpinizma, saradnjom sa Udruženjem "Srce puno osmijeha", saradnjom sa NGO Marathon i učestvovanjem u Danu otvorenih vrata Treće gimnazije, svaki je učenik prvih razreda dobio jasnu sliku o tome šta je društveno korisno učenje i kako kao pojedinac može biti koristan u okruženju u kojem živi.

U našim dosadašnjim aktivnostima zastupljena su sva 4 oblika društveno korisnog učenja – direktno pomaganje, indirektno pomaganje, zagovaranje i istraživanje.

Poručujem dragim učenicima da je ova saradnja za mene bila prekrasna, zahvaljujem svima na učestvovanju i nadam se da ćemo nastaviti raditi ovakve i druge dobre projekte i u narednoj školskoj godini. Zahvaljujem supervizorima na odličnoj saradnji i na spremnosti da zajedno kreiramo, realiziramo i evaluiramo sve aktivnosti.

Zahvaljujem Ministarstvu za obrazovanje, nauku i mlade Kantona Sarajevo na odličnom projektu uvedenom u gimnazije od septembra školske 2018/19. godine i prilici da učestvujemo i doprinesemo.

Koordinatorica: Suada Krezić, profesoric



Dan sporta



Konfučijev institut u Trećoj

Tai Chi čas

U završnom dijelu projektne saradnje Treće gimnazije i Konfučijevog instituta 20. marta 2019. održan je vrlo zanimljiv Tai Chi čas u III₆. Iskusili smo samo dio ove jedinstvene istočnjačke vještine uz dragu gošću Wang Puer, u pratnji uvijek nam privrženog, bivšeg učenika Luke Boškovića.

Hvala Luki što nas je upoznao sa ovim divnim ljudima i radujemo se učenju kineskog jezika u našoj školi.



Poster na času historije

U ponedjeljak, 3. juna 2019. održan je čas historije u saradnji sa Konfučijevim institutom Univerziteta u Sarajevu i simbolično je doveden kraju jednogodišnji projekat "Konfučijev institut u Trećoj gimnaziji", kojim je obilježen početak časova kineskog u našoj školi. Učenici su pravili postere u vezi sa kineskom historijom i imali su priliku detaljnije čuti o historiji i njihovom značenju. Na kraju časa direktor Instituta La Weixin direktorici je poklonio tradicionalnu kinesku sliku cvijeta na rižinom papiru. Hvala profesorici Sedžidi Hadžić na organiziranju i direktorici Senadi Salihović na podršci projekta, kao i profesorici Sanidi Nuhanović i učenicima III₃, na odličnom času historije.



Dan maternjeg jezika u Trećoj

I ove godine smo Međunarodni dan maternjeg jezika – 21. februar obilježili različitim aktivnostima.

Ovim povodom izradili smo brošuru "Jezik teče iz nas, kao i prema nama" koja je izložena u holi škole i prezentirana učenicima. U brošuri su predstavljeni razvoj jezika kroz historiju, izvod iz pravopisnih pravila i pravopisne greške koje su uočavali učenici i prikupili. U prikupljanju materijala za izradu brošure učestvovali su učenici I₁, I₃, I₄ i IV₆, dizajn potpisuje Adna Hadžiselimović, uz pomoć Amine Huko i Emira Kurtanovića, slijedeći zamisao profesorice Dženane Nezirević.



Prof. Elmira Resić iz Instituta za jezik održala je predavanje o temi "Bosanski jezik od srednjovjekovlja do danas" učenicima I₂ u okviru manifestacije Dani Instituta za jezik 2019.

Također, u okviru pomenute manifestacije učenici I₁, I₄ i I₆ prisustvovali su predavanju o temi "Književnost je domovina jezika" u Multimedijalnom centru MAK, u pratnji profesorica Dženane Nezirević i Aide Burak. Profesorice iz Instituta za jezik Edina Vražalica i Sumeja Bičević govorile su o značaju maternjeg jezika, obilježavanju ovog datuma, razvoju jezika kroz historiju i lingvističkoj stilistici. U srijedu, 27. februara 2019. poslušali smo predavanje prof. dr. Jasmina Hodžića u Institutu za jezik.

Međunarodni dan maternjeg jezika proglašen je 1999. kada je Generalna skupština UNESCO-a priznala ovaj praznik u znak sjećanja na studente koji su 21. februara 1952. ubijeni u današnjem Bangladešu na protestima organiziranim zato što njihov maternji jezik nije proglašen zvaničnim.

Gimnazijalci pokazuju svijest i brigu o maternjem jeziku, njegovom značaju, a kreativnošću doprinose obilježavanju ovog značajnog datuma.

"Nauka je ženskog roda"

I ove godine smo na školskoj sceni obilježili praznik, a ovaj petak je to bio Međunarodni dan žena. Sa profesoricama Merimom Pašalić i Selmom Mešić učenice III₁ pripremile su pravi pozorišni komad posvećen ženama "Nauka je ženskog roda". Djevojke su nas glumom i muzikom vratile u prošlost. Ovim nastupom prikazale su kako je nastao ovaj praznik, te nas podsjetile na najznačajnije žene u historiji nauke i njihov utjecaj. Ovom dramom djevojke su predstavile neke od najpoznatijih svjetskih naučnica koje, nažalost, nisu imale mogućnosti istaći potencijal.



Usljedio je dvadesetominutni skeč "Tranziciono 'ono'" kojim su ironično ukazale na prednosti "muškog" svijeta, te zašto se žene trebaju odreći vlastitog identiteta i spola da bi se bolje snašle u takvom okruženju.

Cijeli program su uljepšale vlastitom obradom muzičke numere "Little me" grupe Little mix.

Prisutni su bili oduševljeni ovim performansom učenica III₁.

Una Mazrak i Arijana Vereget, III₁

Obilježavanje 21. marta



Da je srednja škola odgojno-obrazovna ustanova još jednom su pokazali učenici naše škole. Maturanti IV₆, sa profesorom Mevludinom Maličevićem, 21. mart su obilježili na poseban način.

S obzirom na to da se 21. marta obilježava Međunarodni dan borbe protiv rasne diskriminacije, Svjetski dan osoba sa Downovim sindromom, prvi dan proljeća, perzijska Nova godina, Svjetski dan zaštite šuma i Svjetski dan pjesnika, učenici su na kreativan način osmislili aktivnosti kojima su posvetili pažnju svakom od ovih datuma.

Amfiteatar je odzvanjao grajom i bio ispunjen pozitivnom energijom. Poseban naglasak bio je na obilježavanju Svjetskog dana osoba sa Downovim sindromom. Svi učenici koji su učestvovali u realiziranju ovog projekta nosili su šarene čarape u znak podrške djeci i ljudima sa ovim sindromom. Da se posjetioci ne bi osjećali izostavljeno, prije početka projekta učenici su dijelili bombone i šarene čarape. Ovo je još jedan u nizu projekata u kojem su učenici prirodnog izbornog područja svesrdno učestvovali.

Amina Huko, IV₆



Učenici prvih razreda obilježili su 21. mart - Dan osoba sa Down sindromom nošenjem različitih šarenih čarapa i formiranjem olimpijskih krugova u sportskoj sali škole. Dragoj Edni, našoj kraljici inkluzije, htjeli su tako poželjeti dobrodošlicu i poručiti da je osvojila i nas i cijeli svijet svojom nevjerovatnom energijom, upornošću i čudesnim talentima.

Upravo se vratila sa Specijalne olimpijade održane u Abu Dhabiju gdje je u timu sa dugogodišnjom prijateljicom iz Druge gimnazije Aldinom Husejinović i mentoricom Sanjom Tanović prezentirala svoje sportske i sve druge uspjehe kroz inkluzivan rad.



Dramom da ti kažem

U amfiteatru naše škole 26. marta 2019. godine upriličena je svečanost "Dramom da ti kažem". Ovaj projekt je održan povodom obilježavanja Svjetskog dana teatra. Organizaciju ove manifestacije potpisuje profesorica Amila Huseinbašić zahvaljujući kojoj su naši gimnazijalci pokazali talenat. Imali smo priliku uživati u fantastičnim izvedbama prvih i drugih razreda. To je projekt u kojem su učenici



u slučajno odabranim grupama pisali drame. Svaki učenik je bio ocijenjen, ali najbolje drame su izabrane za scensko prikazivanje u amfiteatru. Voditelji te večeri su bili Nur Hrenovica i Ajdin Sadžak. Prve tri drame su nam prezentirali I₅ i I₆: "Šibica", "Odlazak", "Šta će drugi reći". Posljednje tri drame izveli su drugi razredi "Ljubavni šeštar", "Za kamere" i "Persefon". Zahvaljujemo našim učenicima koji su učestvovali i priredili divno veče.

Alisa Bjelonja, I₆

Dugogodišnje iskustvo u prosvjeti mi je nedvosmisleno pokazalo da učenici pamte ono u šta su emocionalno upleteni, u šta moraju uložiti svoju stvaralačku energiju, ono u čemu do izažaja dolazi njihova kreativnost, koju, tokom školovanja, nastojim u svakom učeniku probuditi i držati je budnom.

Nakon što u prvom razredu upoznamo dramu kao književnu vrstu, čitajući "Antigonu", učenike podijelim slučajnim odabirom u grupe sa po 5-6 članova. Zadatak im je da napišu vlastitu dramu u kojoj će svako od njih imati ulogu. Tekst drame i afišu mi predaju do određenog roka, za taj dio dobiju dvije ocjene. Nakon toga slijedi najzbudljiviji dio kada učenici igraju dramu u amfiteatru škole pred svojim odjeljenjem. I za taj dio dobiju ocjenu, a u dnevnik upisujem aritmetičku sredinu te tri ocjene koje su već dobili iz teksta, afiše i izvođenja drame na sceni.

Na kraju, najbolje drame iz svih odjeljenja u kojima predajem učenici izvode pred širom publikom. Za tu priliku napravimo plakat koji najavljuje projekat na kojem su i nazivi svih najuspješnijih drama kao i imena učenika – glumaca u tim dramama.

Napominjem da mi u ovom projektu uveliko pomaže redovno posjećivanje sarajevskih pozorišta, četiri puta u jednoj školskoj godini. Na taj način učenici zavole odlaske u pozorište, a i nauče mnogo toga u vezi sa pozorišnom umjetnošću.

Amila Huseinbašić, profesorica

I ove godine smo se družili

Kao i prethodnih godina, i ove je nastavljena saradnja i razmjena učenika iz Danske. Treća gimnazija je poznata po tome što je godinama domaćin mnogim učenicima iz različitih dijelova svijeta, a saradnja sa školama iz Danske realizira se od 2013. godine. Učenici IV₃ ugostili su 21. marta 2019. godine dva profesora i 37 učenika iz srednje škole iz Sønderborga. Prošle godine naši gimnazijalci bili su gosti u Danskoj, a ove su učenici iz Danske predstavili svoj grad te način življenja. Saznali smo mnogo i o njihovoj školi kroz prezentaciju gostiju u amfiteatru škole. Nakon upoznavanja organizirali smo fudbalsku utakmicu. Dok je utakmica trajala, sa djevojkama smo obišli školu. Posebno im se svidjela STEM-učionica te enterijer naše škole. Slobodno vrijeme proveli smo u ugodnom druženju razmjenjujući iskustva i stičući prijateljstva. Planirana je i organizacija još jedne razmjene u ovoj godini. Bitno je spomenuti da ništa od ovoga ne bi bilo moguće bez naše drage profesorice Sanide Nuhanović koja se veoma trudi uključiti učenike u mnoge projekte.



Lamija Džaferović, IV₃

Posjeta učenika iz Norveške Trećoj gimnaziji

Posjete učenika iz različitih zemalja Evrope našoj školi nastavljaju se na našu radost i u 2019. godini.

Zahvaljujući Konzulatu BiH u Oslu, u amfiteatru 6. februara ugostili smo učenike iz Umjetničke srednje škole "Edvard Munch" iz Osla. Domaćin je bio III₂ sa pedagogicom Hasijom Dedović i profesoricom Sedžidom Hadžić. U studijskoj posjeti su učestvovala 22 učenika završnih razreda i tri nastavnika iz ove norveške srednje škole.



Gostima smo pripremili prigodan program, predstavili rad naše škole, dali kratki osvrt na historiju, kulturu i zanimljivosti naše zemlje, održali smo zajedničku radionicu o temi "Značaj historije i njen utjecaj na živote mlađih generacija". Zatim smo obišli školu, družili se, razmijenili iskustva i utiske, saznali o norveškom obrazovnom sistemu i stekli nova prijateljstva. Razgovarali smo i o nastavku saradnje i mogućnostima uzvratne posjete. Nadamo se da ćemo je u budućnosti i realizirati.

Hasija Dedović, pedagogica

Ugostili smo ambasadora Italije s učenicima

Toplu dobrodošlicu je naša radosna direktorica poželjela učenicima iz Italije proljetnog dana, 28. marta 2019. godine. Upoznali smo se u amfiteatru, a nakon formalnog susreta nastavili smo druženje na Vilsonovom šetalištu.

Grupa italijanskih učenika, zajedno sa profesorima te ambasadorom Italije Nicolom Minasijem i prevodiocem, posjetila je Treću gimnaziju kao dio nastavnog plana i programa - razmjene koja se ove godine realizira u Bosni i Hercegovini. Učenici Adna Salković i Nedim Numanović predstavili su podatke o našoj zemlji na engleskom jeziku. Zatim je gostujući učenik pričao o školstvu i obrazovanju u Italiji.



Zanimljivost je da u Italiji srednjoškolsko obrazovanje traje pet godina. Zvuči puno, ali kada si maturant, zaželiš tu još jednu godinu druženja. Potom smo obišli školu. Posebno im se dopao kabinet njemačkog jezika, a nisu krili oduševljenje ni STEM učionicom.

Učenici IV₄ nastavili su druženje s gostima i nakon nastave sve dok nisu morali poći nazad u smještaj kako bi se spremili i nastavili put u Mostar. Za Treću gimnaziju su imali samo riječi hvale što nam, naravno, mnogo znači. Vrata Treće gimnazije su otvorena za međunarodnu saradnju i razmjenu učenika.

Arneta Obralića, IV₂

Opći roditeljski sastanak I razreda

Zajednički sastanak roditelja učenika I razreda održan je 5. februara 2019. godine u školskom amfiteatru. Sastanku su prisustvovali svi razrednici I razreda, direktorica, zamjenica direktorice, psihologinja, pedagoginja, predsjednik Vijeća roditelja i predsjednica Vijeća učenika.

Roditeljski sastanak je otvoren nastupom Plesne sekcije. Zatim je uslijedilo govor direktorice Senade Salihović. Veoma inspirativan govor održao je i predsjednik Vijeća roditelja Murčo Obućina. Nakon toga su roditelji upoznati o rezultatima učenika u učenju i vladanju na kraju I polugodišta koje je prezentirala pomoćnica direktorice Amra Čolić.

Tematski dio roditeljskog sastanaka bio je posvećen novom projektu Društveno korisno učenje koji se od ove školske godine provodi u svim odjeljenjima I razreda. Koordinatorica ovog projekta profesorica Suada Krezić roditelje je upozнала o aktivnostima koje su učenici realizirali. Završnu riječ imala je predsjednica Vijeća učenika Amila Manjić koja je prisutne upozнала o radu Vijeća. Roditeljski sastanak je završen nastupom učenika III₁, izvođenjem tačke "Etiketa" sa Decembarskih dana kulture.

Zahvaljujemo roditeljima jer su prisustvovali ovom sastanku u velikom broju kao i na kvalitetnoj saradnji koju imamo.



U okviru programa prevencije maloljetničke delinkvencije i nepoželjnih oblika ponašanja učenika u Trećoj gimnaziji za školsku 2018/19. godinu, u saradnji s Vijećem roditelja, organizovano je i uspješno realizovano predavanje za roditelje učenika svih razreda o temi "Faktori rizika za nastanak ovisnosti i uloga porodice u prevenciji".

Predavanje su održale predstavnice JU Terapijska zajednica Kampus Selma Šehić i Sanela Pekić, s kojima naša škola saraduje na projektima prevencije i rizika od ovisnosti i ovisničkih ponašanja kod učenika.



USAID-ov program za bolje sutra

U amfiteatru naše škole 15. aprila 2019. godine održana je prezentacija IMEP projekta učenicima III₁ i III₂. IMEP je petogodišnji USAID-ov program koji podržava nezavisnost medija i slobodu izražavanja u BiH. Prezentaciju je odžala novinarka Rubina Čengić i učenicima predstavila ulogu i značaj medija u obrazovanju, medijskoj pismenosti i potakla učenike na kritičko promišljanje o medijskim sadržajima koji su im svakodnevno dostupni.

Poseban značaj dat je projektu "Građani novinari" u kojem mogu učestvovati i učenici aplicirajući na projekte Media Laba u okviru organizacije "Centar za promociju civilnog društva".



Učenicima su date upute kako samostalno ili grupno učestvovati u ovom projektu slanjem tekstova, priča, fotografija i videozapisa s kritičkim ili afirmativnim osvrtom na društveno-politička dešavanja, događaje iz lokalne zajednice, iz škole i drugim njima značajnim temama. Učenici su ohrabreni da iznose stavove i tako utječu na svijest javnosti i na proaktivan način se zauzimaju za kvalitetniji život u našem društvu.

Hasija Dedović, pedagogica

Donacija BH Telecoma od 4.000 KM

U februaru ove godine Treća gimnazija je potpisala vrijedan Ugovor o donaciji Dioničkog društva BH Telecom od 4.000 KM. Naša škola je donaciju iskoristila u realizaciji projekta "Opremanje informatičkog kabineta". Informatički kabinet sada je dodatno opremljen kolor printerima, te je instaliran i interaktivni projektor. Nova oprema u informatičkom kabinetu dodatno će poboljšati kvalitet nastave i omogućiti učenicima nove i interesantne načine usvajanja novog gradiva.



"Avengersi" + nauka

U saradnji sa UNESCO-om i UNICEF-om, u našoj školi je organizirano predavanje u okviru projekta popularnih predavanja iz oblasti prirodnih nauka i animiranih videa u kojima bi se učenicima i nastavnicima osnovnih i srednjih škola na području 28 općina BiH približio značaj naučnih dostignuća 21. vijeka.

Cilj je da se učenici i profesori upoznaju o aktuelnim trendovima u nauci, te da se tako doprinese povećanju nivoa naučne pismenosti. Ova popularizacija nauke je istovremeno namijenjena i učenicima i učenicama, bez rodne diskriminacija i s ciljem osvještenja uloge žena u nauci u 21. vijeku. Naime, učenici koji su uključeni u projekat imaju priliku slušati priču o tome kako nauka spaja ljude i ima jedan jezik, a to je jezik formula, znakova, simbola i relacija koji su nepromjenljivi bez obzira na podjele, razlike, pisma, te entnonacionalne pripadnosti širom globusa.

Još jedna zanimljivost koju ovaj projekat donosi jeste "peer to peer" komponenta predavanja. Ova metoda predstavlja izuzetno uspješan pristup, jer nema elementa "podučavanja". Predavanje o temi "Nauka u filmovima o superherojima" održala je Jelena Klinić.

Našim maturantima iz IV₄ i IV₅, kao i učenicima II₅, predavanje je pružilo odgovor na pitanje koliko filmovi o superherojima predstavljaju stvarnost i nauku.

Na predavanju nam je objašnjena veza između Ajnštajnovе teorije relativnosti i "Rainbow bridge" mosta iz filmova "Thor" i "Avengers". Potom smo slušali o zakonima kvantne mehanike koji vladaju u elementarnim česticama atoma, te smo razjasnili zabunu o česticama koje imaju masu, a koje ne.

Ni biologija nije bila zanemarena. Osvrnuli smo se na DNK analizu, tj, kako se identificira osoba, otkriva kriminalac i određuje očinstvo, kao i na mutacije DNK. Ovaj dio predavanja je bio povezan sa filmovima "X-man" u kojima ljudi imaju supermoći upravo zbog mutacija. Neki elementi u filmovima potpuno su protivni zakonima fizike, kao npr. u filmu "Iron Man 2" u kojem su se stvarali sintetički hemijski elementi koji ne postoje u prirodi.

Predavanje je završeno velikim i zaslužnim aplauzom, jer je predavanje bilo neobično, moderno i interesantno, pogotovo za one koji vole filmove "Avengers" i superheroje.



Arneta Obralića, IV₂
Foto: Amina Huko, IV₆

What's your story?

U ponedjeljak, 27. maja, Treća gimnazija ugostila je sedam perspektivnih i uspješnih Bosanaca i Hercegovaca. U amfiteatru škole Elma Slabić, sa timom, organizirala je konferenciju What's your story? na kojoj su nama poznata lica pričala životne priče, uspone i padove, te inspirirali stotinu mladih koji su prisustvovali konferenciji. Konferenciju je otvorila moderatorica Elma Slabić. Prvi na scenu izašao je Haris Hadžialić, IT stručnjak, koji je zaslužan za uvođenje interneta u BiH, i to još 1994. IT stručnjak i uspješni bh. biznismen govorio je o teškom putu i savjetovao nam da uvijek težimo ka ispunjenju cilja. Instagram-storijima svoju priču predstavio je Jan Kulenović, direktor agencije Munja, kako je



njegov put počeo još kada je imao 17 godina, a od tada je posjetio 78 država svijeta. Dejana Rosuljaš Špiler ispričala nam je kako se našla pred malim ekranima još kao studentica Pravnog fakulteta Univerziteta u Sarajevu i kako je upornošću ispunila san o vlasitoj emisiji.

Kontrapunkt je raspjevao i zabavio prisutne zajedno sa Amelom Ćurićem, koji je ostao na sceni i pričao o tome kako se zaljubio u gitaru i pjevanje, te dva puta osvojio prvo mjesto na muzičkom takmičenju. Bivši dekan Pravnog fakulteta Univerziteta u Sarajevu prof. dr. Borislav Petrović motivirao je i zabavio prisutne simpatičnom pričom o pokušaju da se dopadne ministrici kako bi pomogao Fakultetu. Ana Bavrka, televizijska voditeljica, manekenka, model i fitness-instruktorica, govorila je o tome kako je sa samo 16 godina otvorila fitness-studio u Mostaru, a kasnije i kozmetički, te kako dospjela na male ekrane. Fikret Hodžić, televizijski voditelj, ispričao nam je kako je teško bilo dokazati se kao televizijski voditelj i novinar i uspjeti u ostvarenju cilja.

Zahvaljujemo i čestitamo Elmi Slabić na odličnom projektu i realiziranoj ideji koja će, nadamo se, pokrenuti mlade.

Meliha Kasapović, III₅
Foto: Mirza Bakal, II₈ i Tea Dedić, I₂

Dan zaljubljenih u Trećoj gimnaziji

Tradicija pisanja pisama učenika svojim prijateljima pa i uposlenicima škole nastavljena je i ove godine. Dva dana prije Dana zaljubljenih svima dobro poznata kutija bila je postavljena u holu škole, a učenici su s radošću ubacivali pisma, a drugi su zauzimali stolove u holu škole i smišljali najbolji način za iskazivanje osjećanja. Naime, ovo je za sve bila prilika da iskažu ljubav i zahvalnost. Iako su ta dva dana, dok je kutija bila u holu škole, bila ispunjena ushićenjem učenika, istinska sreća je uslijedila upravo na Dan zaljubljenih kada su pisma podijeljena.

Amila Gabela, III₅



Trudom i marljivim radom mogu se ostvariti svi ciljevi

Lejla Smječanin, učenica I₄, osvojila je 1. mjesto na Kantonalnom takmičenju održanom 6. marta 2019. Na Federalnom takmičenju, održanom 30. marta 2019. u Visokom, naša učenica je osvojila 1. mjesto i tako se plasirala na Državno takmičenje, koje je održano 6. maja 2019. u Visokom. Naša učenica je osvojila 1. mjesto u ekipnom dijelu takmičenja i 4. mjesto u pojedinačnom takmičenju.

Učenica je vrijedno radila i aktivno se pripremala sa profesoricom vjeronauke Esadom Grabus. Lejla je na najbolji način predstavljala našu školu i svojim primjerom pokazala kako se trudom i marljivim radom mogu ostvariti svi ciljevi.



Najbolji hor ikada!

U svečanoj sali Osnovne škole "Aleksa Šantić" 11. aprila 2019. godine održano je Kantonalno takmičenje horova/zborova uz instrumentalnu pratnju. Devet sarajevskih srednjih škola predstavilo se odličnim izvedbama u zadanoj kategoriji, a naša škola osvojila je prvo mjesto!



Višeglasnom izvedbom pjesme "You raise me up" Muzička sekcija Treće gimnazije izglasana je za najbolju. Zahvaljujući profesorici Aidi Kamenica, nedavno je ostvarena i međunarodna saradnja sa slavnim horom "Kinjo" iz Japana. Ovo takmičenje kruna je dosadašnjih nastupa i vrijednih priprema. Treća gimnazija potvrdila je još jednom da jednako njeguje ljubav prema nauci i umjetnosti. Čestitamo profesorici i članovima sekcije!

Iza izvanrednog plasmana stoji neiscrpni trud profesorice Aide Kamenica. Pod njenim vodstvom, hor i orkestar u raznim kategorijama bilježi značajne rezultate na takmičenjima, a i oduševljava nas na raznim manifestacijama revijalnog karaktera. Bila je velika čast predstaviti pripremljeno pred uvažanim žirijem u sastavu: Alma Karić, profesorica Osnovne muzičke i baletske škole "Novo Sarajevo", Munir Mešanović, profesor Osnovne muzičke škole Ilidža, Tijana Vignjević, profesorica Srednje muzičke škole Sarajevo.

Abela Rastoder, IV₂

Delaida Čoko druga u Kantonu iz francuskog jezika za treće razrede

U ponedjeljak, 15. aprila 2019. u prostorijama JU Gimnazija "Obala" održano je Kantonalno takmičenje iz francuskog jezika za učenike trećeg razreda gimnazije (B i C nivo jezičke kompetencije).

Na ovogodišnjem Kantonalnom takmičenju iz francuskog jezika učestvovalo je 29 učenika, a drugo mjesto u kategoriji C nivoa jezičke kompetencije osvojila je naša učenica Delaida Čoko iz III₂. Čestitamo učenici na izvrsnom rezultatu i zahvaljujemo se ostalim učenicama na učestvovanju.

Nafiza Hubijar, profesorica



Naši fizičari drugi u KS ekipno, a Igor Zarić prvi na Federalnom takmičenju

Kantonalno takmičenje iz fizike za učenike srednjih škola održano je u subotu, 23. marta 2019. godine. Treću gimnaziju je predstavljalo 14 učenika:

Grupa A1 (mehanika i termodinamika za prvi razred):	Grupa B (elektromagnetizam, oscilacije i talasi):	Grupa A3 (mehanika i termodinamika za treći razred):	Grupa C (optika, atomska i nuklearna fizika)
Irma Galijašević I-3 Adna Boračić I-4 Tarik Pašić I-6 Tarik Mahalija I-4	Azra Alagić II-5 Anida Čaušević II-5 Amina Čobić II-6 Naida Ustavdić II-4	Asija Boračić III-4 Naila Džananović III-4 Abdulhadi Velagić III-4	Igor Zarić IV-5 Andrej Marković IV-4 Tarik Jelačić IV-6

Većina učenika naporno su radili i mjesecima rješavali kompleksne zadatke - na univerzitetskom nivou. Ponosni smo na naše naše učenike, jer su dostojno predstavili školu i u grupnom uspjehu bili drugi u Kantonu Sarajevo.

Najviše su se istakli Azra Alagić, učenica II₅, koja je osvojila drugo mjesto u grupi B, odnosno iz oblasti elektromagnetizam, oscilacije i talasi; Čobić Amina, učenica II₆, koja je osvojila 6. mjesto u istoj kategoriji; Boračić Asija, učenica III₄, koja je osvojila 4. mjesto u grupi A3 - mehanika i termodinamika; te Igor Zarić i Tarik Jelačić, koji su osvojili 6. i 7. mjesto u grupi C - optika, atomska i nuklearna fizika.

Dvije sedmice poslije kantonalnog takmičenja uslijedilo je Federalno takmičenje iz fizike u prostorijama

Mašinskog fakulteta u Zenici 6. aprila 2019. godine. Našu školu predstavljalo je pet učenika: u grupi A (mehanika i termodinamika) Asija Boračić, u grupi B Azra Alagić i Amina Čobić i u grupi C Andrej Marković i Igor Zarić.



Igor Zarić je osvojio prvo mjesto u grupi C, na što smo vrlo ponosni, Andrej Marković 6. mjesto, Azra Alagić 7. mjesto, Amina Čobić 9. mjesto, dok je Asija Boračić osvojila 11. mjesto.

Zahvaljujemo učenicima na njihovom trudu i zalaganju na takmičenjima, te im želimo puno sreće i znanja i u narednoj školskoj godini.

Aktiv profesora fizike

Salko Vladavić treći na prvom takmičenju iz maternjeg jezika i književnosti

Prvo Kantonalno takmičenje iz maternjeg jezika i književnosti održano je 9. aprila u Drugoj gimnaziji. Na takmičenju su učestvovala 63 takmičara iz svih srednjih škola.

U kategoriji gimnazija III razredi najbolja je bila Hatidža Čengić iz Gazi Husrev-begove medrese, druga je bila Amina Ćurovac iz Druge gimnazije, a treći Salko Vladavić iz Treće gimnazije. Svečanom ceremonijom okončano je prvo Kantonalno takmičenje iz maternjeg jezika.



Iman Bostandžić druga iz engleskog jezika u KS

Iman Bostandžić osvojila je drugo mjesto iz engleskog jezika na kantonalnom takmičenju, pod mentorstvom profesorice Edine Lokvančić, koje se održalo 17. aprila 2019. godine u prostorijama Gimnazije "Obala".



World Scholar's Cup

Učenice I₁, Elma Moranjković, Azra Halimanović i Ejla Sadiković, pod rukovodstvom profesorice Edine Lokvančić, učestvovala su na prestižnom takmičenju The World Scholar's Cup u Internacionalnoj srednjoj školi Richmond Park High School u Sarajevu, te su osvojile nekoliko medalja u različitim kategorijama, kao što su debata i pisanje eseja. One su se kvalifikovale za takmičenje na svjetskom nivou koje će se održati u Holandiji od 21. do 26. jula 2019. godine.



Azra Alagić treća na kantonalnom takmičenju iz matematike

U Gimnaziji Maarif 11. i 12. marta 2019. godine u Sarajevu održano je 24. kantonalno takmičenje iz matematike za učenike srednjih škola. Azra Alagić, učenica II₅, osvojila je sjajno treće mjesto i tako se plasirala na federalno takmičenje.

Azra Alagić i Tarik Velić predstavljali su našu školu na federalnom takmičenju koje je održano 30. marta 2019. godine na Prirodno-matematičkom fakultetu u Sarajevu.

Ponosni smo na sve naše takmičare i želimo im puno uspjeha u sljedećoj školskoj godini i svim narednim takmičenjima.



Veliki uspjesi na takmičenjima iz njemačkog jezika

Učenici i učenice njemačkog jezika naše škole kontinuirano pokazuju znanje i postižu uspjehe u različitim aktivnostima, manifestacijama i projektima, a posebno su značajni njihovi uspjesi na takmičenjima.

Na ovogodišnjem kantonalnom takmičenju naše učenice Nejra Šaljić III₆ i Edina Suljić II₆ ostvarile su pobjede u svojim kategorijama jezičke kompetencije. Nejra je bila kantonalna pobjednica na nivou C1, a Edina na nivou B2. Ove fantastične uspjehe uljepšala je i činjenica da su ovogodišnja kantonalna takmičenja za osnovne i srednje škole održana u našoj školi. Treća je bila odličan domaćin i zahvaljujući angažmanu naših profesorica njemačkog jezika i ostalih uposlenika škole, uz podršku naše školske uprave, pružila je odlične uslove za susrete najkvalitetnijih učenika njemačkog jezika svih škola Kantona Sarajevo.



Ovogodišnje kantonalno takmičenje bilo je zahtjevnije u odnosu na prethodna, jer je sadržavalo pored pismenog i usmeni dio takmičenja na kome su najbolje plasirani takmičari u grupama prezentirali odabrane teme. Žiri su činili predstavnici partnerskih institucija i pokrovitelji ovogodišnjeg kantonalnog takmičenja, Austrijski Institut, Ambasada Republike Njemačke, Centrala za školstvo u inostranstvu (ZfA), Kulturweit i Aktiv nastavnika njemačkog jezika KS.

Nakon kantonalnog takmičenja pratile smo našu Nejru i Edinu na državno takmičenje, Olimpijadu njemačkog jezika u organizaciji Goethe Instituta i naše učenice su u vrlo jakoj konkurenciji ponovo pokazale svoje kvalitetno znanje i postigle odličan uspjeh. Na nivou C1 naša Nejra se plasirala na treće mjesto, a naša Edina na nivou B2 na šesto mjesto.

Čestitamo od srca našim učenicama!

*Džananović Džemilamna i Omeragić Sanela,
profesorice njemačkog jezika*



Potrebno uvođenje služenja vojnog roka

Pobjednice školskog takmičenja bile su učenice III₂ koje su predstavljale školu na općinskom takmičenju, na kojem su osvojile treće mjesto prezentirajući temu "Civilno služenje vojnog roka".

Pobjednička ekipa je radeći na temi anketirala građane i saznali su da veliki broj Sarajlija podržava ovaj projekt. Učenice kažu da bi uvođenjem civilnog služenja vojnog roka osvijestili mlade ljude, povećali patriotizam i radili na općoj dobrobiti kako države, tako i njenih građana. Tokom provođenja ovog projekta učenice su kontaktirale pripadnike Oružanih snaga BiH i Ministarstvo odbrane BiH. Projekt je predstavljen javnosti direktnim uključenjem u program TVSA.

U projektu su učestvovalе učenice: Lejla Avdić, Delaida Čoko, Amila Grbo, Hana Rovčanin, Lamija Reko, Melisa Pirović, Elma Vuk, Nadžija Ždralović, uz pomoć profesorice Ismete Trepalovac.



Takmičili smo se i u pružanju prve pomoći

U subotu, 23. marta 2019. održano je 14. Općinsko takmičenje iz pružanja Prve pomoći. Učestvovala su ekipe iz četiri srednje škole sa područja općine Novo Sarajevo. U sklopu cjelodnevnog takmičenja održanog u Osnovnoj školi Kovačići uživali smo u savladavanju novih vještina i druženju. Od svih ekipa posebno se istakla Treće gimnazije koja je osvojila prvo mjesto. Nakon toga uslijedile su intenzivne pripreme za kantonalno takmičenje. Održano je u subotu, 20. aprila 2019. u Osnovnoj školi Malta. U iznimno teškoj konkurenciji naša vrijedna ekipa predvođena Senadom Halilovićem, članom Crvenog križa Novo Sarajevo, osvojila je četvrto mjesto. Ekipu je na takmičenje vodila profesorica biologije naše škole Dženita Karović. Pred našom vrijednom ekipom su nova iskustva, takmičenja i pobjede. Tim Treće gimnazije koji se predstavljao na takmičenjima čine: Nejla Mahmutović (I1), kapiten ekipe, Selma Salman (I2), Emela Bahtanović (I4), Adla Veljović (I5), Anida Podrug (II1), Andrea Sparavalo (III6), Merima Mustafić (III6), kao i Amina Feta-Hasković (III5) i Amina Ibišević (III5) koje su vrijedno radile s našom ekipom. Čestitamo našim učenicima i želimo im još mnogo dobrih rezultata.



Emela Bahtanović, I₄

UNSA Ski kup 2019

Na Bjelašnici je 8. marta 2019. održan UNSA Ski kup 2019 u organizaciji Fakulteta sporta i tjelesnog odgoja Univerziteta u Sarajevu. Takmičenje u veleslalomu je organizirano za učenike srednjih škola KS, te profesore tjelesnog odgoja. Naš učenik Harun Kunovac je osvojio prvo mjesto, a profesorica Zinaida Fejzić je u svojoj kategoriji na cilj stigla druga. Treću gimnaziju su predstavljali još Matej Marinčić i Tarik Panjeta. Zahvaljujemo im što su na dostojan način, još jednom, predstavili svoju školu.



Malik Kahvedžić drugi na Business Challengeu



Ja sam Malik Kahvedžić i ovo je moje iskustvo sa "Munja Business Challengeom".

Tokom aprila u okviru Business Challengea održana su četiri polufinala u Tuzli, Banjoj Luci, Sarajevu i Mostaru na kojima je sudjelovalo 208 mladih iz 36 lokalnih zajednica i 70 srednjih škola. Kao jedan od pobjednika polufinala u Sarajevu, sudjelovao sam od 17. do 19. aprila 2019. godine u finalu u Sarajevu koje je otvoreno u Infocentru Evropske unije.

Tema finala bila je osmišljavanje poslovne ideje, proizvoda ili usluge koje odgovaraju potrebama i interesima građana treće životne dobi i koje su bazirane na međugeneracijskoj saradnji. Finalna prezentacija i proglašenje pobjednika održana je u sklopu

najveće investicijske konferencije u BiH Sarajevo Business Forum. Na državnom takmičenju osvojio sam drugo mjesto i plasirao se na internacionalno takmičenje koje će se održati u Crnoj Gori gdje ću predstavljati BiH, ali, prije svega, našu Treću gimnaziju.

Druga pratilja misice Balkana 2019.

Strmoglav i vrtoglav je to put, priznat ćete. Nimalo nije lako od nule postići taj zamišljeni ambiciozni cilj ma kakav on bio. No ipak, većina naših učenika uspije proslaviti takav uspjeh. Neki na školskom nivou, drugi na kantonalnom, a pojedini i na međunarodnom.

Amina Hasanbegović, učenica IV₃, je učestvovala na ovogodišnjem Izboru za Miss Earth BiH u kojem se plasirala kao prva pratilja te potom na Izboru za Miss Balkana 2019. godine u Banjoj Luci gdje je osvojila titulu druge pratilje. Bilo nam je zadovoljstvo čuti priču njenog jedinstvenog iskustva kako bismo je mogli podijeliti sa vama.



Koji su tvoji planovi?

Što se tiče modelinga, krajem godine ću učestvovati na svjetskom izboru, vjerovatno u Kini, a, s druge strane, imam u planu upisati pravo ili razrednu nastavu. U svakom slučaju, kada skinem ovu krunu, želim biti djevojka koja ima cilj poboljšati kvalitete i biti dobar čovjek.

Arnela Obralića, IV₂



Odakle ideja da se prijaviš za izbor Miss?

Desilo se to dok sam sjedila u kafiću i jedna djevojka mi je prišla i zapanjeno me gledala i rekla: „Pa zašto se ti ne bi prijavila?“

Jesi li očekivala titulu s obzirom na učestvovanje djevojaka iz sedam zemalja?

Svaka djevojka koja se prijavila, prijavila se da osvoji nešto, tako da jesam, očekivala sam. Prvi put, priznajem, nisam očekivala jer sam razmišljala o tome da se neću dobro snaći. Međutim sve je prošlo u najboljem redu.

Jesi li osjećala pritisak konkurencije?

Kako je vrijeme odmicalo, atmosfera je postajala sve opuštenija tako da smo se sprijateljile nerazmišljajući o konkurenciji.

Predstavljaju li lenta i kruna novu odgovornost?

Da, itekako. Misica nije djevojka kojoj je dovoljno da bude samo lijepa i zgodna. Ona mora biti pametna, humana, da se izdvaja od drugih djevojaka.

Kakve su reakcije poslije osvojenih titula?

Svi su doista pozitivno reagovali, posebno u školi. Još jednom zahvaljujem na iznimnoj podršci i razumijevanju profesora. Naravno, tu su i roditelji, porodica je broj jedan i osjećam da su svi oni zajedno sa mnom postigli taj uspjeh.



Treća je šampion!

Nakon proljetnog raspusta, od 9. do 11. aprila u Prvoj bošnjačkoj gimnaziji održan je memorijalni turnir "Mersud Nikšić". Na turniru su učestvovali: Prva gimnazija, Druga gimnazija, Treća gimnazija, Srednja ekonomska škola, Katolički školski centar "Sveti Josip", Gazi Husrev-begova medresa i Prva bošnjačka gimnazija u pet disciplina: odbojka za učenike, odbojka za učenice, košarka za učenike, košarka za učenice i stoni tenis.

Prvog dana turnira održane su košarkaške utakmice za učenike i učenice. Prvu utakmicu naša muška ekipa je igrala protiv ekipe Srednje ekonomske škole. Ekipa u sastavu Orhan Berberović, Mirza Junuzović, Timur Trbonja, Omar Bašić, Faris Đip, Amar Bajramović, Sadin Šehović, Haris Kukuruzović, Emir Osmanspahić, Kerim Salić, Emir Kurtanović sa kapitenom Tarikom Panjetom u odličnoj

atmosferi savladala je ekipu Srednje ekonomske škole rezultatom 48:21 i tako se plasirala u sljedeći krug takmičenja. Uslijedila je utakmica protiv ekipe Prve bošnjačke gimnazije. Najljepši koš ne samo na utakmici, već na cijelom turniru dao je Omar Bašić. Bio je to šut sa više od pola terena i "trica bez kosti". Također, Faris Đip i Kerim Salić posebno su se istakli na ovoj utakmici. Ekipa Treće gimnazije je savladala ekipu Prve bošnjačke gimnazije rezultatom 31:26. Posljednju utakmicu naši momci odigrali su protiv ekipe Druge gimnazije pobjeđujući rezultatom 32:26. Ponovo je salom odzvanjalo „Bit će Treća opet šampion“.

Memorijalni turnir "Mersud Nikšić" protekao je u najboljoj organizaciji i atmosferi. Svi članovi muške košarkaške sekcije dali su doprinos koji je urodio plodom. Ovaj trofej, još jedan na policama škole, za mene mnogo znači, a posebno sam ponosan na uspjeh naše ekipe. Ovakve turnire ću uvijek pamti i ostatak će mi kao jedna od ljepših uspomena iz srednjoškolskih dana", rekao je Tarik Panjeta nakon odlične tri utakmice na ovom turniru. Turnir je otvorila direktorica Prve bošnjačke gimnazije Naida Hota Muminagić i podsjetila na to da je sport je doista najbolji način kako ujediniti mlade ljude. Ekipi košarkašica, u sastavu Azra Hadžigrabić, Selma Šehović, Tea Dedić, Ilma Čekić, Lejla Fulurija, Sabrina Pirija, Vildana Hamzić, Irma Hasković, Berina Milišić, Abela Rastoder, Vildana Hodžić sa kapitenom Aminom Huko, protivnice su bile ekipe Prve bošnjačke gimnazije, Druge gimnazije i Gazi Husrev-begove medrese. Veoma borbeno i hrabro naše djevojke su igrale sve utakmice. Nakon

napornog dana naše djevojke su bile trećeplasirane. „Utakmice su bile veoma naporne, ali se mi nismo predale do posljednjeg trena. Ovo je posljednji put da sam kapiten ženske košarkaške ekipe naše škole. U ime cijele ekipe, mogu reći da smo zadovoljne igrom i da je sve vrijeme bila pozitivna atmosfera kakav god rezultat bio. Sigurna sam da će mi i ovaj turnir ostati među najljepšim uspomenu", rekla je Amina Huko.

U srijedu, 10. aprila, takmičenje je nastavljeno u kategoriji odbojke za učenike. Naša ekipa, u sastavu Ajdin Sadžak, Erdin Mešić, Malik Kahvedžić, Fadi Egho, Bakir Mečkić, Irman Muratović, Nadir Šehić, Faruk Terzić, Mirza Abaza, sa kapitenom Anurom Hadžimuratovićem, jutro je započela utakmicom protiv Prve gimnazije koji su pobijedili rezultatom 2:1. I Prvu bošnjačku gimnaziju pobijedili smo rezultatom 2:1. Nakon odlične utakmice naša ekipa je savladala ekipu Druge gimnazije rezultatom 2:0 i tako osvojili ovogodišnji turnir. „Prvo bih zahvalio učenicima svih škola na fer i korektnoj igri, a mojim suigračima na najboljoj. Zadatak smo obavili na vrhunskom nivou i veoma sam sretan. Ovo je veoma lijep i zabavan događaj, te se nadam da će se održavati i u budućnosti", bio je komentar kapitena Anura. Poslije svih utakmica u sali se samo čulo:





“Treća giza šampion”. Za naše odbojkašice ovaj dan nije bio tako sretan. Ekipa Treće gimnazije, u sastavu Kanita Kadušić, Lamija Imamović, Amila Bećirbegović, Ilma Čekić, Lejla Nuhić, Zerina Čengić, Amna Mešanović, sa kapitenom Nejrom Gojak, izgubila je od Druge gimnazije 2:1.

Posljednji dan takmičenja bio je rezervisan za stoni tenis. Našu školu su predstavljali Adnan Hajrić i Alemka Hasečić. U meču protiv Gazi Husrev-begove medrese nakon pojedinačnih igri bilo je 2:2. Uprkos velikom trudu i nekoliko odličnih poena, naša ekipa poražena je rezultatom 2:3 te tako završila nastup na ovogodišnjem turniru.

Na zatvaranju turnira dodijeljene su zahvalnice i pehari najboljim među najboljim. Ekipa Treće gimnazije sa ovog turnira donosi tri pehara na svoje police. Ovakav uspjeh ne bi bio moguć da nije bilo profesora sporta Adema Bajrića i Zinaide Fejzić, koji su pripremali ekipe i bodrili ih sa klupe.

Foto i tekst: Huko Amina, IV₆ i Osmanagić Tajra, III₅

Ostavili smo trag na Ligi srednjoškolaca

Svi volimo s vremena na vrijeme osjetiti takmičarski duh pogotovo ako imamo ekipu s kojom možemo dijeliti tu nemirnu strast. Svake nedjelje od februara do aprila muška i ženska nogometna ekipa Treće gimnazije učestvovala je u takmičenju Liga srednjih škola. Predvođeni selektorom ekipe Mirzom Imamović, obje ekipe su se uspjele popeti u vrh najboljih.

Ženska ekipa osvojila je drugo mjesto savladavši u finalnoj utakmici Srednju ugoditeljsko-turističku škole rezultatom 1:0. Ponosni smo na igračicu Ines Ružić koja je osvojila titulu najboljeg strijelca sa 17 ostvarenih golova. Na našu žalost, u četvrtfinalu izgubili su protiv pobjednika ovogodišnje Lige srednjih škola Druge gimnazije rezultatom 2:3. Amar Lukovac osvojio je titulu najboljeg strijelca sa osam golova, a asistencije mu nisu ni brojali.

Ostat će nam u pamćenju i fenomenalni golovi Aida Delića, Farisa Delića, Ervina Vladića, Mirze Abaze i Sanjina Guše. A tek da nam nije bilo golmana Fadija Egha... Ne bismo tako daleko stigli.

Arneta Obralija, IV₂



Treća gimnazija - predstavnik Bosne i Hercegovine na Balkanskom omladinskom festivalu

Treća gimnazija je po prvi put predstavljala Bosnu i Hercegovinu na Balkanskom omladinskom festivalu koji se održava povodom stogodišnjice obilježavanja 19. maja - Dana sjećanja na Atatürka, Dana mladosti i sporta. Program je upriličen u Edirneu, Republika Turska, u organizaciji grada Edirne, Generalne direkcije za omladinu i sport grada Edirne, Centra za omladinu grada Edirne i srednjih škola. Petnaest učenika naše škole u pratnji profesorice Muzičke kulture Aide Kamenica i zamjenice direktorice Amre Čolić predstavljali su Bosnu i Hercegovinu. Osim naše države na festivalu su bili predstavnici: Srbije, Bugarske, Moldavije i Republike Sjeverna Makedonija.



Tog četvrtka naši učenici su se spremali na dugo iščekivani put za Tursku. Krenuli smo na putovanje 16. maja u 20 sati. Bilo nam je malo tijesno, ali to nije moglo da pokvari naše uzbuđenje. Nakon 17 sati putovanja, napokon smo stigli u dom gdje nas je dočekala naša draga Emine, koja je bila naš vodič kroz Edirne. Nastup je održan u nedjelju na kojem smo briljirali. Dobili smo ogromni aplauz za izvedbu plesa lindo, a potom za izvedbu sevdalinke Farisa Kasapovića, kojeg su ostali članovi podržavali igrom. Izuzetno zanimljiva tačka publici bila je drama "Hasanaginica", koju su oduševljeno pratili. Naša predivna Nejra Buljina nas je ostavila bez teksta izvedbom sevdalinke uz pratnju Farisa na harmonici. Završna tačka bio je folklor kojeg smo spremali dugo vremena, a sav trud se isplatio jer smo osvjtljali obraz kako Trećoj gimnaziji, tako i Bosni i Hercegovini. Posljednju noć smo proveli zajedno uz muziku i smijeh. Kada je došlo vrijeme da se vratimo, htjeli smo sve ponoviti jer smo se svi sprijateljili i funkcionisali kao jedna osoba. Mislili smo da se nećemo uspjeti družiti, no ovo putovanje je bilo posebno i uvijek bismo ga ponovili. U povratku smo svratili u Sofiju, gdje smo proveli dva sata. Hvala našoj profesorici i zamjenici direktorice što su bile tu za nas i nadamo se da je i njima bilo lijepo.

Posebna zahvalnost ide prijateljima Treće gimnazije UTIKUS "Bašlija" i KUD "Lola", koji su nam ustupili svoje nošnje, te gospodinu Suadu Zuki i gospodinu Hasanu Guši koji su obezbijedili majice, zastavice i reklamni materijal za učesnike.

Amra Koldžić, Il₄, Lejla Kovač Il₆

Završna svečanost stvaralaštva učenika KS

Već 23 godine učenici osnovnih i srednjih škola Kantona Sarajevo imaju priliku predstaviti umjetničko stvaralaštvo. U okviru manifestacije Dani Kantona Sarajevo, u Bosanskom kulturnom centru, u četvrtak, 9. maja, održana je Završna svečanost stvaralaštva učenika osnovnih i srednjih škola.

Manifestacija je bila ispunjena lijepom atmosferom i notama najuspješnijih izvođača sa kantonalnog takmičenja horova uz muzičku pratnju. Manifestaciji je doprinio i Hor i okrestar naše škole sa izvedbom pjesme You Raise Me Up. Imali smo priliku poslušati najbolje literarne i vidjeti najbolje likovne radove najkreativnijih sarajevskih učenika o temi „Od obale moje do obale tvoje, sarajevski mostovi ponosno stoje“. Ove godine poslušali smo i literarni rad Ejle Sadiković, učenice prvog razreda, koja je osvojila 4. mjesto i dobila priznanje na manifestaciji.

Meliha Kasapović, III₅
Foto: Tajra Osmanagić, III₅



“Od obale moje, do obale tvoje, sarajevski mostovi ponosno stoje”

Ponekad razmišljam o tome kakve smo mi to generacije u Sarajevu. Neki rođeni u njemu, neki došli u njega, a razlozi su mnogobrojni. Previše je pretrpio ovaj naš grad. Emocije koje se konstantno miješaju i prepliću toliko da mi zamagle vid i više nisam ni sigurna osjećam li istinsku ljubav prema ovom malenom centru zemlje ili me pak guši. Često bih htjela pobjeći daleko od njega, daleko od politike, sjećanja na rat i svega što ga je pregazilo. Sigurna sam da mnogi stanovnici pamte ovaj šeher dok je bio na koljenima. Pamte ruševine, muku i jad koja je nekoč obavijala čitavu njegovu površinu. Miljacka, rijeka koja je prije tog zla spajala dvije obale, dvije polovine jednog cijela, tada je postala hladna oštrica noža koja je rascijepala čudo od grada. Na moju sreću, nikad nisam spoznala inje rata, ali ponekad mi se čini da ono i dalje ledi neka srca.

Želim pamtiti i pričati o jedom drugom vremenu, o potpuno drugačijem Sarajevu. O gradu kojeg sam spoznala sama, bez tuđih predaja i sjećanja. Šetam Vilsonovim šetalištem dok se na nebu kroz krošnje granja bore i probijaju sunce i oblaci. Rijetko lišće koje je nekim čudom preživjelo zimu kao da zadnjim snagama odzdravlja novim pupoljcima na starim granama, umornim od duge i teške zime. Nabujala Miljacka miluje svoje obale i priprema ih za vedrije dane. Cijeli moj život se kreće rijekom koja teče duž tih obala. Moji djed i baka nisu bili iz Sarajeva. Djed je došao iz malog mjesta u Hercegovini, a školovao se baš tu - na Vilsonovom šetalištu, u Srednjoj dvopropreradivačkoj školi. Ne mogu sakriti osmijeh koji mi se naslika na licu svaki put kad prolazim pokraj te škole. Baka je davno došla u Sarajevo iz sela u Posavini. Imala je težak život kao dijete i nekako se skrasila u ovom gradu i pronašla mrvicu sreće u njemu. Znam da su se njih dvoje sreli na jednom od mostova, sarajevskih mostova, ali, iskreno, nisam sigurna na kojem. Majka mi je pričala da njihova ljubav nije bila prihvaćena u njihovim porodicama iz mnogih razloga, ali ipak je opstala, živjela, stvarala i dijelila ljubav sa drugima 45 godina dok moja baka nije umrla. Živjela je ta ljubav kao što su i sarajevski mostovi živjeli, jedina razlika je u tome da će naši mostovi nastaviti stajati dok od ove ljubavi ostaju samo tragovi. Majka je rođena na Hridu, memli strani, kako to ovdje kažu, a otac na Vratniku. Čitav život bili su na dvjema različitim obalama rijeke. Sreli su se u drugoj državi, zavoljeli i odlučili živjeti zajedno na jednoj obali. Naši životi su isprepleteni, nekada brzi, nekada spori kao i rijeka koja protiče kroz ovaj grad.

Sarajevo širi svoje obale kao ruke i prihvata sve ljude dobre volje. Narode različite, odnosno slične, prihvata ih kao majka djecu u naručje i voli bezuvjetno. Voli svoju djecu na objema stranama rijeke, koje su zauvijek spojene mostovima, kao i riječima oslikanim dobrom namjerom. Mostovi naši ponosno stoje i spajaju ljude dviju obala. Spajaju narod, kulturu i običaje, ali najvažnije, spajaju davnu prošlost sa tako bliskom budućnosti.

Ejla Sadiković, I₁

“Za remizu” u Jelićevoj



Nakon nezaboravnih Decemarskih dana kulture najbolji od trećih razreda III₃ marljivo je radio na proširivanju i dopunjavanju sedmominutne predstave “Za remizu”. Dugo smo iščekivali noviju verziju predstave koja nas je još u decembru nasmijala do suza, a naši društvenjaci su zadovoljili sva očekivanja u srijedu, 16. januara 2019. kada su izveli predstavu na daskama u Jelićevoj u humanitarne svrhe.

Pred punom salom u Centru kulture i mladih Općine Centar Sarajevo u 18 sati zasvirao je bend Kontrapunkt, a potom nas je Fadi Egho, u predstavi voditelj TV Lavande, zajedno sa ostalim učenicima svog odjeljenja, nasmijao do suza. Učenik Fadi Egho nas je nakon emisije “Sa Fadijem na ti”, gdje je ugostio vlasnika sarajevskih tramvaja gospodina Remiza, proveo kroz tramvaj. Na komičan način talentirani učenici su prikazali svakodnevne scene u javnom gradskom prijevozu i kritički ukazali na probleme sa kojima se susrećemo. Učenici su glumili izvanredno i zasigurno su uljepšali večer mnogobrojnim posjetiocima.

Uspješnu večer ispunjenu smijehom naši društvenjaci su proslavili na sceni sa svojim razrednikom Abidom Zukićem.

Čestitke kreativnim učenicima!

Zerina Omerbašić, III₁, Meliha Kasapović, III₅
Foto: Amina Huko, IV₆

Kako ste došli na ideju da proširite predstavu i pokažete je publici van amfiteatra naše škole?

Na ideju da proširimo predstavu došli smo tako što su priče o dobrom provodu prilikom igranja predstave ostale u našem odjeljenju dugo nakon kraja Decemarskih dana kulture.

Kako je bilo pripremati predstavu za veću publiku?

Pripremati predstavu za veću publiku bilo je podjednako zanimljivo kao i za publiku iz Treće gimnazije, ali bilo je malo više pritiska.

Kako ste se osjećali dok ste bili na sceni?

Na sceni su osjećaji varirali od potpune preplašenosti do velike euforije nakon svakog aplauza.

Kakva su iskustva i raspoloženja bila nakon predstave?

Nakon predstave bili smo sretni jer je sve dobro prošlo, ali i malo tužni jer se ova priča završila.

Zerina Omerbašić, III₁

Prirodnjaci i “Svijet koji nestaje”

U sklopu nastave biologije učenici IV₆ su sa profesoricom Almom Gibović 10. maja 2019. godine posjetili Zemaljski muzej.

Kako bi bolje shvatili gradivo, slušali su predavanje o endemskim vrstama BiH u Botaničkoj bašti Muzeja. Nedavno otvorena izložba pod nazivom “Svijet koji nestaje” podigla je svijest o katastrofama koje se mogu desiti.

Tekst i foto: Amina Huko, IV₆



Kaleidoskop teatra kroz objektiv mladih

U srijedu, 10. aprila 2019. manifestaciju "Kaleidoskop teatra kroz objektiv mladih" u Narodnom pozorištu otvorile su učenice članice Dramske sekcije Treće gimnazije, pod vodstvom profesorice Amile Huseinbašić, predstavom "Femina, feminae". Ova predstava je autorsko djelo učenica III₁. Prvi put je izvedena u takmičarskom dijelu Decembarskih dana kulture. Već tada ova predstava je predstavljala ozbiljan pozorišni komad. Naše učenice su tokom izvođenja predstave ispričale predivnu priču koja u fokus stavlja ženu. Publika u Narodnom nije krila oduševljenje. Veoma smo ponosni na naše talentirane djevojke Aidu Hot, III₁, Ajšu Osmanović, III₁, Arijanu Vereget, III₁, Hanu Rovčanin, III₂, Aminu Mahmutagić, IV₆, Nejrju Ajdinović, I₅, Sumeju Čoko, I₅, Adlu Veljović, I₅, Lejlu Smječanin, I₄, i Ajnu Đapo, I₄.

Uz glumu i ples, naši učenici su prezentirali i druge kreativne sposobnosti, te je talentirani Emir Kljajić, II₂, predstavio likovni rad na




kojem je zgrada Narodnog pozorišta. Predstavili smo se i brojnim afišama koje su učenici profesorice Amile Huseinbašić uradili pišući drame u sklopu projekta "Dramom da ti kažem". Kao i uvijek, Treća gimnazija je predstavljena u najboljem izdanju i na ovoj smotri stvaralaštva učenika srednjih škola Kantona Sarajeva. Učestvovali su učenici 24 srednje škole predstavivši se eksponatima, izvođenjem predstava, pravljenjem frizura i te šminkanjem. Zahvaljujemo članicama Dramske sekcije, Emiru Kljajiću, svim učenicima koji su učestvovali u realizaciji, a posebna zahvalnost profesorici Amili Huseinbašić, koordinatrici ovog projekta.

Ajna Đapo, I₄

Foto: Mirza Bakal, II₆

Posjeta Muzeju ratnog djetinjstva



Sa profesoricom Amilom Huseinbašić učenici II₁ i II₅ posjetili su Muzej ratnog djetinjstva 3. i 5. juna. Učenici II₁ obišli su stalnu izložbu muzeja, koja uključuje šest doniranih predmeta koji pričaju priču sirijske djece, te 46 predmeta bh. djece, uspomena iz rata 1991 - 1995. Učenici II₅ učestvovali su i u radionici o stvaranju mira. Pogledali smo nekoliko veoma interesantnih videosvjedodžbi, poslušali priče o tinejdžerima kojima su pokušali oteti mladost, ali je njihova volja bila je jača. Išli su u školu, studirali, organizovali zabave i živjeli slobodno koliko im je situacija dozvoljavala. Živjeli su da nama pričaju priče onih drugova koji više nisu tu. Rat nije stvar prošlosti, on ubija naše vršnjake, a drugima otima mladost dok ja pišem ovu rečenicu i dok je vi čitate. Neću reći da toga nismo svjesni. Svjesni smo užasa koji se dešavaju, ali ih ignorišemo jer se dešavaju, „tamo negdje daleko“. Mir počinje kolektivnom odlukom o prestanku ignorisanja užasa koji se dešavaju svaki dan oko nas. Ovo je naš svijet više nego svijet naših djedova. Mi smo generacija koja će, ako ne promijenimo stav, sutra biti žrtva nekog trećeg rata ili boriti se u njemu.

Emma Selimović, II₅

Rasplakala nas je "Žaba"

U srijedu, 29. 5. 2019. od 20 sati u Kamernom teatru 55 pogledali smo predstavu "Žaba". Učenici I i II razreda, zahvaljujući profesorima Dženani Nezirević, Esadu Karahodžiću i Aidi Burak, bili su oduševljeni glumačkim ostvarenjima Emira Hadžihafizbegovića, Mirsada Tuke, Aleksandra Seksana i Moamera Kasumovića. Na sceni Kamernog teatra ova predstava igra deset godina. "Žaba", predstava u režiji Elmira Jukića, iznova izaziva suze teatarske publike i tjera na promišljanje o potrazi za smislom i ljubavlju.



Posjeta učenika IV₃ Muzeju Jevreja



Učenici IV₃ razreda su 28. februara posjetili Muzej Jevreja u sklopu terenske nastave. U Muzeju Jevreja je upriličena izložba o holokaustu, pa su učenici dodatno proširili znanje o antisemitizmu i odnosu prema Jevrejima od 1939. do 1945. godine.



Na otvorenju izložbe "Tri života Sarajevske hagade"

Povodom 131. godišnjice Zemaljskog muzeja 29. januara 2019. učenici III₆ sa razrednicom Almom Gibović, posjetili su izložbu "Tri života Sarajevske hagade". Izložba rasvjetljava i prati put Sarajevske hagade od srednjovjekovnog Kraljevstva Aragon, preko Italije do Sarajeva, podcrtava ne samo njenu umjetničku i estetsku posebnost, već i kulturno-historijsku važnost i ulogu knjige u duhovnom životu Jevreja. Poseban segment izložbe čine dosadašnja izdanja Sarajevske hagade, uključujući prvo iz 1898. te posljednje štampano 2018. godine, čiji je izdavač Zemaljski muzej Bosne i Hercegovine. Autori izložbe "Tri života Sarajevske hagade" su dr. Aleksandra Bunčić i dr. Mirsad Sijarić.



Zanimljive sadržaje pogledali smo i u drugim postavkama Muzeja, koje su u vezi sa nastavnim sadržajima biologije trećeg razreda. Naišli smo na novinare turske televizije za koju su učenici dali kratki intervju o temi "Interes mladih za kulturna dešavanja u našem gradu". Uživali smo u ovoj zanimljivoj posjeti Zemaljskom muzeju.

Katarina Šanje, III₆

Sajam srednjih škola

Ispred BBI centra 27. maja 2019. održan je Sajam srednjih škola na kojem se predstavila i naša Treća gimnazija. Sa učenicima i učenicama prvih, drugih i trećih razreda bili su: pedagogica Hasija Dedović, profesor sociologije Armin Hubjer te profesorice Aida Burak i Sanja Salihović.

Učenici osnovnih škola mogli su se informirati o svim srednjim školama. Naša se predstavila prezentiranjem izbornih područja, predmeta, vannastavnih aktivnosti. Brojni osnovci su bili zainteresirani za Treću te smo im detaljno predstavili sve u vezi sa upisom, životom i radom u njoj.

Ajša Osmanović, III₁



Kako započeti karijeru programera?



Učenici II5 i IV5, sa profesoricom Aidom Ražanica, imali su priliku prisustvovati prezentaciji i zvaničnom početku rada prvog portala za informisanje o učenju i karijeri programera, ITkarijera.ba. Prezentacija se održala 22. maja 2019. u kabinetu Bitalliance na Elektrotehničkom fakultetu. Uz prezentaciju portala, koji pruža informacije o svim segmentima karijere jednog budućeg programera, od početka, učenja, formalnog obrazovanja, do prakse i poslova koji se nude u ovoj oblasti, učenici su imali priliku čuti vrlo inspirativnu priču vršnjakinje koja je već vlasnik malog biznisa koji se bavi veb-dizajniranjem. Sigurni smo da će i naši učenici uspješno krenuti u tom smjeru.

Aida Ražanica, profesorica

Šta se to krije iza svih bankomata, transakcija, aplikacija...

U srijedu, 24. aprila, učenici III₅ posjetili su IT sektor Raiffeisen banke sa profesoricama Aidom Ražanica i Ernom Mujić. IT sektor jedan je od dva najveća u BiH. Uposlenici IT sektora banke proveli su učenike i pobliže im objasnili kako se razvijaju nove ideje i programi u banci, s kakvim se problemima susreću i kako ih rješavaju. Učenicima matematičko-informatičkog područja uposlenici su rado odgovarali na mnogobrojna pitanja i otkrili šta se to krije iza svih bankomata, transakcija, aplikacija i ostalih dijelova bankarstva u vezi sa informatikom. Bilo nam je drago posjetiti i osjetiti dašak atmosfere posla kojeg će u budućnosti sigurno raditi pojedini učenici.

Meliha Kasapović i Amila Gabela, III₅



Naša posjeta Istanbulu

Nakon višednevnog boravka u Istanbulu u cilju posjete Bahcelievler Adnan Menderes Anatolian High School desetak učenika, sa direktoricom Senadom Salihović, profesoricama Melihom Salihović i Melisom Tvrtković, te sekretarkom škole Indrirom Mulahasanović, vratili smo se sretni, puni nezaboravnih utisaka.

Organizacija puta, doček i smještaj u porodice, boravak u školi i brojne aktivnosti koje su naši domaćini pripremili bili su besprijekorni. Bilo nam je veoma zanimljivo biti na časovima u ovoj visoko rangiranoj srednjoj školi koja je vrlo slična našoj. WUčeni, profesori i uprava škole u svakom trenutku su nam bili na raspolaganju i učinili su sve da se lijepo i ugodno osjećamo.



Da podsjetimo, Istanbul je jedini grad koji se nalazi na dva kontinenta, na raskrsnici kultura, civilizacija i religija, bogat je brojnim kulturno-historijskim spomenicima. Uživali smo u obilasku Galata kule sa koje se pruža prekrasan pogled na evropski dio grada, na zaljev Zlatni rog, te Bosfor sa njegovim mostovima. Obišli smo carsku palaču Dolmabahçe, jednu od pet najljepših u Evropi, a koja ljepotom i luksuzom ostavlja bez daha,

Plavu džamiju, jedinu pored one u Meki sa šest munara, Topkapi, sultanovu palaču u čijoj se riznici nalazi drugi najveći dijamant na svijetu. Bazari, poput Kapali čaršije i Pijace začina i slatkiša prepuni su živopisnim dućanima i egzotičnim radnjicama gdje se trguje uz obavezno cjenkanje. Fascinantna je eksplozija boja, mirisa i ukusa koja vas okružuje.

Ovdje ću stati, a mogla bih još nabrajati, jer je to samo jedan dio viđenog i doživljenog. Naši domaćini su nam otvorili vrata svoje škole i omogućili boravak i druženje sa našim vršnjacima. Otvorili su i vrata svojih domova, gdje su nas ugestili i pazili kao svoju djecu i posebno moram dodati, širom otvorili svoja srca, jer smo bili okruženi dragim i dobronamjernim ljudima sa kojima smo ostvarili prijateljski odnos.

Posebno zahvaljujemo direktoru İsmailu Ahmetoğlu i profesoricama Seldi i Müge Girgin na divnom gostoprimstvu. Početkom naredne školske godine očekujemo ih u Sarajevu i željeli bismo da im ta posjeta ostane u posebnom i nezaboravnom sjećanju kao i nama ova.

Nađa Ajanović, II,



Vijeće učenika u Mostaru

Članovi Vijeće učenika naše škole, u pratnji koordinatorice Vijeća profesorice Merime Pašalić i pedagogice škole Dedović Hasije, posjetili su Mostar 19. aprila 2019. godine. Bila je to lijepa prilika da zaokruže rad Vijeća učenika za ovu školsku godinu. Izlet u Mostar i lijepo vrijeme iskoristili smo za druženje, sumiranje ostvarenih rezultata ove godine, te šetnju i obilazak grada.

Pred kraj školske godine u kojoj je Vijeće učenika naporno i vrijedno radilo, ostaje nam još da izaberemo novog predsjednika/predsjednicu za narednu školsku godinu, sumiramo utiske i uspjehe koje smo ostvarili.

Merima Pašalić, profesorica



Naši izviđači na Mostarskim susretima 2019.



Treća gimnazija je u martu ove godine postala sjedište najmlađeg izviđačkog odreda u Kantonu Sarajevo. Ideja o Odredu izviđača „Pofalići“ nastala je još prije četiri godine, kada je grupica učenika osnovne škole istog imena, uz vodstvo učiteljice Zinete Vejzović, položila izviđačku zakletvu. Četiri godine poslije, one najupornije još ponosno nose izviđačku maramu. Među njima je i naša učenica Ema Selimović, II₅, sada načelnica odreda, koja je svoju ljubav prema izviđačima dovela u Treću gimnaziju.

Da se trud isplati dokazali smo ulaskom OI „Pofalići“ u Savez odreda izviđača Kantona Sarajevo. Prva avantura novih izviđača i planinki, pčelica i poletaraca, bila je upravo

učestvovanje na Mostarskim susretima 6. aprila 2019. godine. Dok se u Sarajevu slavio Dan grada, 25 članova odreda su se u Mostaru družili sa izviđačima iz cijele Bosne i Hercegovine. Iako razočarani što se i sami nismo mogli takmičiti, mi, stariji članovi, rado smo pripremali mlađe drugove za takmičenje i vedro ih bodrili dok su rješavali zadatke na poligonu smještenom na Španskom trgu. Boje OI „Pofalići“ branile su dvije ekipe u kategoriji poletaraca i pčelica. Za nas cilj ovog takmičenja nije bila pobjeda, već stjecanje prvog iskustva i sklapanje novih izviđačkih prijateljstava. Iako su završili na 26. mjestu od ukupno 40 ekipa, što nije rezultat kome se većina nada, svi su se kući vratili veseli, jer je cilj ispunjen. Naš autobus bio je prilikom povratka i šareniji jer je nekolicina izviđača zamijenila svoje odredske marame sa novim drugovima.

Želimo zahvaliti svima koji su naporno radili da nam omoguće prostor za rad i učenje uz izviđačku pjesmu, prije svega predsjedniku Saveza odreda izviđača Kantona Sarajevo Bruni Ostojiću, te direktorici Senadi Salihović.

Ema Selimović, II₅

Slobodan dan u Blagaju

Učenici II₁, sa razrednicom Vlastom Bogdanović, imali su priliku otići na dvodnevni izlet u Blagaj, grad bogate historije, u kojem je i Tekija na Buni. Zahvaljujući osvojenom prvom mjestu među odjeljenjima drugih razreda na Decembarskim danima kulture, odlučili su iskoristiti slobodan dan 29. marta. U ranim jutarnjim satima su se sastali ispred škole i krenuli autobusom. U hotelu Ada imali su na raspolaganju sportske terene za različite aktivnosti, ali većinu vremena smo proveli na fudbalskom terenu. Izvor rijeke Bune je

jedan od najvećih i najljepših izvora u Evropi i vjerovatno najbolji primjer podzemne kraške rijeke. U neposrednoj blizini izvora sagrađena je Tekija, spomenik kulture iz ranog turskog doba u BiH. Sutradan, 30. marta, posjetili smo Mostar i tržni centar Mepas. Vratili smo se sretni i zadovoljni jer smo proveli dva dana u rekreaciji, druženju i nevjerovatnoj prirodnoj ljepoti.



Foto i tekst: Esma Junuzović, II₁

Hajdemo u planine!

Odjeljenja III₁ i III₅ odlučila su iskoristiti slobodan dan kao odmor od školskih obaveza i otići na Vlašić, te tako imati produženi vikend. Na Vlašić smo krenuli opremljeni svime što je potrebno jednom učeniku, a to su dobra muzika i još bolja atmosfera. Iako smo putovali autobusom, put do apartmana smo prepješačili kako bismo uživali u prirodnim ljepotama. Smjestili smo se i odmorili, a kako je vrijeme

bilo veoma lijepo, obilazak je mogao početi. Dok su jedni šetali stazama, drugi su se ugodno smjestili u kafić iz kojeg su imali divan pogled na planinu, a treći su već počeli kuhati ručak. U večernjim satima uživali smo u druženju. Sutradan smo posjetili Travnik u kojem smo ostali nekoliko sati. Nakon obilaska znamenitosti grada krenuli smo prema Sarajevu.

Razrednice Edina Lokvančić i Erna Mujić i učenici vratili su se veoma zadovoljni organizacijom puta i iskustvima sa izleta.

Amila Gabela, III₅

Foto: Tajra Osmanagić, III₅



Vozom u Mostar

U subotu, 1. juna 2019, učenici I1 i I4, u pratnji razrednika Dženane Nezirević i Esada Karahodžića, posjetili su Mostar. Učenici su uživali u jednodnevnom izletu. Posjetili su Muzej Stari grad, Stari most i i druge znamenitosti Mostara. Kišno Sarajevo su napustili u ranim jutarnjim satima i u Mostar se uputili vozom. Starogradske ulice su odzvanjale veselim osmijesima sarajevskih gimnazijalica. Sretni, odmorni, veseli i spremni za veliko finale njihove prve godine u Trećoj gimnaziji!

Ajna Đapo, I₄



Emira Hadžimuratović

Nakon završene osnovne škole i gimnazije u rodnom mjestu Bugojno upisala sam Filozofski fakultet u Sarajevu, odsjek Germanistika. Najveći utjecaj na tu odluku imao je moj prof. njemačkog jezika Manfred Tretter, rođeni Nijemac. Uvijek mi je govorio da "imam žicu" za taj jezik.



Prvo zaposlenje je bilo u Arhivu BiH od 1. septembra 1979. do 1. februara 1995. kao prevodilac i viši arhivist. U Trećoj gimnaziji zaposlena sam od 1. februara 2005.

Od tog vremena do danas moj stav prema učenicima je ostao isti, a predavanja su se, naravno, zasnivala na inovativnim metodama i u skladu sa NPP kao i opremljenošću škole. Poštujem ličnost učenika i, uz obavezu educiranja, nastojala sam uvijek da budem, prije svega, dobar čovjek i da u skladu sa svojim znanjem i mogućnostima djelujem savjetodavno.

Poručila bih mladim profesorima da se stalno educiraju i imaju razumijevanja prema učenicima, odnosno, da im budu i autoritet, ali i dobar prijatelj, a učenicima da vrijedno uče, poštuju svoje

profesore, ali i međusobno, i čuvaju svoju Školu. Moj radni vijek u Trećoj obilježili su mnogi projekti u samoj nastavi, ali i u vannastavnim aktivnostima. Tu prije svega mislim na njemačku čitaonicu, projekat DSD, autorstvo ili koautorstvo sa kolegicom Džemilamnom Džananović u izradi udžbenika.

Na kraju bih zahvalila bivšoj i sadašnjoj Upravi na čelu sa direktorima Eminom Avdagić, Avdom Hajdom, Senadom Salihović i njenoj zamjenici Amri Čolić, Sindikatu Treće i svim kolegama na podršci koju sam imala u veoma teškoj periodu svog života. Posebno zahvaljujem svojim dragim kolegicama Emiri Hubjer i Senadi Redžepagić s kojima sam provela nezaboravne trenutke i koje su uvijek tu kao najiskreniji i najodaniji prijatelji.

S nadom da ću uvijek moći doći, da će me dočekati raširene ruke dragih prijatelja i sa velikom zahvalnošću,

Vaša Emira H.

Mara Matković



Kako ste odlučili postati profesorica njemačkog jezika? Jeste li sanjali o ovom pozivu kada ste bili učenica?

Pohađala sam Srednju medicinsku školu u Sarajevu i učeći o bolestima, razmišljala sam o tome da bi bilo ljepše radni vijek provesti sa mladim i zdravim ljudima i odlučila sam da studiram Njemački jezik i književnost.

Kada ste počeli raditi u Trećoj gimnaziji?

U Trećoj gimnaziji radim od 1997. godine.

Prema Vašem mišljenju, koje promjene su se dogodile u obrazovanju tokom Vašeg radnog vijeka?

Promjene su se dogodile u metodologiji rada, a i u odnosu učenik – profesor.

Je li se Vaš stav prema učenicima i načinu predavanja promijenio?

Moj odnos prema učenicima je uvijek bio dobar, a metodologija rada se svakako promijenila, jer to zahtijevaju moderne metode rada i savremeni udžbenici.

Koji biste savjet uputili mladim profesorima na početku njihove karijere?

Savjetovala bih mladim kolegama da se trebaju odnositi prema učenicima kao prema svojoj djeci, a oni će to znati prepoznati i uvažiti.

Šta biste poručili Vašim učenicima?

Uvijek sam savjetovala učenicima da budu odgovorni i marljivi u svom radu.

Nadam se da je Vaša karijera, pogotovo u našoj Trećoj, bila ispunjena prelijepim trenucima. Šta je, u suštini, najljepša strana ove profesije?

Voljela sam da radim sa učenicima u Trećoj gimnaziji, a i u drugim školama u kojima sam radila. Pa, to su mladost, radost, bezbrižnost, razigranost, a, naravno, i učenički nestašluci.

Kada biste se mogli vratiti na početak karijere i mlađoj sebi reći bilo šta, šta biste rekli?

Ne volim da se sjećam prošlosti.

Kojim riječima se opraštate od svog kolektiva?

Bilo mi je lijepo sa vama, sa radošću sam dolazila na posao i svi ćete mi nedostajati.

Emra Selimović, II₅

Salahudin Čolović



Salahudin Čolović dugo godina radio je kao noćni čuvar u Trećoj gimnaziji.

Prvi dio radnog vijeka proveo je rodnom gradu Pljevlja, a u našoj školi zaposlen je od obnove škole, od marta 2001. godine. I danas rado odlazi u Pljevlja majci i braći. Oženjen je i otac dvaju sinova.

Nikad mu nije bilo teško očistiti dvorište od lišća, počistiti snijeg, ukloniti suhe grane, tako da je znao raditi dugo u noć ove poslove. A školska avlija je uvijek bila čista. Svoj posao je obavljao izuzetno odgovorno vodeći računa o svim dijelovima Treće gimnazije. Pošten i častan čovjek, odgovoran i radin kolega.

Kolegice i kolege

“Razglednice bh. gradova u doba austrougarske vladavine”

Profesorica historije Emira Hubjer je 8. oktobra 2018. u amfiteatru održala ogledni čas iz s učenicima svih odjeljenja drugog razreda. Tema je bila: “Razglednice bosanskohercegovačkih gradova u doba austrougarske vladavine”. Profesorica je istakla da obilježavamo 140 godina od kada je Austro-Ugarska dobila mandat da okupira pokrajine Bosnu i Hercegovinu (član 25), 5. oktobra, odnosno 7. oktobra 1908. godine Austro-Ugarska anektirala je BiH, čime je pokopala sve nade Bosanaca i Hercegovaca da dobiju nezavisnost. Završetkom I svjetskog rata – 1918. nestaje sa evropske scene Austro-Ugarsko Carstvo,



a BiH je od 1. decembra te godine u sastavu Kraljevine Srba, Hrvata i Slovenaca. Učenici su prikazali dvije prezentacije uz koje se govorilo o gradovima poput Sarajeva, Mostara, Banjaluke, Bihaća, Goražda, Srebrenice, Brčkog, Dervente, Trebinja, zatim su se videozapisima javljali iz Sarajeva i Mostara te su prezentovani likovni radovi. Pokazali su da se na zabavniji način zahvaljujući razglednicama može naučiti historija. Važno nam je da doprinesemo obilježavanju značajnih datuma naše historije u ovom periodu (od 1878. do 1918. godine).

Erna Žuga, II,

Anel Tahirović: “U životu će biti uspona i padova, ali slijedite svoje snove”

Kako je izgledala Treća gimnazija u periodu kada ste Vi bili učenik?

Treća gimnazija je i tad kao i danas bila jedna od najboljih sarajevkih gimnazija (nama učenicima već nakon mjesec samo najbolja bez ovog “jedna od”). Uvijek sam se u Trećoj osjećao kao kod svoje kuće, i to se nikad neće promijeniti. Bilo je svega, i dobrih i manje dobrih trenutaka, ali toplina i dobrodošlica bili su i ostali jedna od glavnih odlika škole.

Oprostite mi, ali skrenut ću malo s teme i pitanja, ali imam potrebu da kažem nekoliko stvari. U to vrijeme, recimo prije nekih deset godina, škola je bila posvećena učenicima, a roditelji su vjerovali i pomagali školi da će omogućiti njihovom djetetu da postane jedan gimnazijalac (značajna je to titula, vjerujte mi). Danas, kada sam svojim angažmanom u školi svjedočio činjenici da roditelji potpuno drugačije djeluju prema školi i tjeraju “mak na konac” s tim ocjenama, doživljam razočarenje u takav sistem, sa pogrešnim vrijednostima. Nije škola jedan broj između jedan i pet, škola je daleko iznad toga i naši profesori imaju mnogo ljepših stvari od ocjena da nam ponude, ali uz atmosferu punu pritiska i razgovora sa roditeljima nemaju priliku da to urade u onom kapacitetu u kojem bi mogli. Strašno me boljelo da gledam i prisustvujem situacijama kad jedan roditelj ima zakonski zagarantovano više prava od jednog profesora, jer su rijetki dani u toku mog studija, a i života kad se nisam sjetio nekog svog profesora i njihovih savjeta. Mislim da se stvari moraju promijeniti, a naši profesori dobiti mjesto koje zaslužuju, jer zamislite samo na koliki broj djece jedan profesor prenese znanje i iskustva u toku svog radnog vijeka (četverocifren je broj veći od četiri hiljade).

Koje su Vaše najljepše uspomene iz srednje škole?

Veliki je broj uspomena u vezi sa Trećom u periodu dok sam bio učenik ove škole, ali neke od najdražih su definitivno u vezi sa pripremom razreda za Decembarske dane kulture i za maturlnu ekskurziju na kraju školovanja.

Kada ste upisivali studij, šta je sve utjecalo na Vaš izbor?

Bio sam zainteresovan za matematiku i fiziku i u razgovoru sa porodicom, odluka je bila da upišem studije na Elektrotehničkom fakultetu u Sarajevu, ali (uvijek ima neko ali) i da sam upisao studij Matematike na Prirodno-matematičkom fakultetu ne bih se pokajao.

Koji biste savjet dali nekome ko želi studirati u inozemstvu? Je li je bilo teško dobiti stipendiju za završavanje studija?

Što se tiče studija u inozemstvu, najbitnije je da osoba ima čvrstu odluku da to želi i da je spremna izdvojiti neko vrijeme da se posveti traženju mogućnosti za studij. Kada su ta dva uvjeta ispunjena, sve ostalo ide poprilično jednostavno, jer otprilike se traže isti dokumenti, procedura je slična, obično je presudan intervju i dojam koji ostavite na komisiju. A što se tiče stipendije, nije je teško dobiti samo je potrebno dosta strpljenja da se stvari poslože.

S obzirom na to da ste neko vrijeme radili kao profesor u školi, možete li napraviti paralelu, kako je biti učenik, a kako profesor u Trećoj gimnaziji? Kakav je osjećaj kada se nakon nekog vremena vratite u srednju školu?

Povratak u Treću u ulogu profesora je bio poseban doživljaj. Tad se sve promijenilo, jer pređete “na drugu stranu”, odnosno zaviriš iza onih vrata zbornice i počneš gledati ljude koji su ti bili profesori iz neke druge perspektive. Biti učenik i biti profesor su definitivno dvije drugačije situacije, ali kad je u pitanju Treća gimnazija, ona toplina i radost dolaska u školu ostaju isti. Ja se rado vratim u školu i mislim da će tako biti do kraja mog života, jer Treća je bila i uvijek će biti nešto posebno.



Jeste li još u kontaktu sa prijateljima iz srednje škole? Je li bilo teško navikći se na novu sredinu nakon četiri godine u Trećoj?

Sa nekima jesam, sa nekima nisam, ali, eto, ponekad bude prilike da se sretnemo na nekim neočekivanim mjestima i događajima. U početku bude malo nezgodno jer četiri godine navikneš na ista lica i na jedan sistem rada, a onda se sve to okrene za stotinu osamdeset stepeni, ali brzo se komunikacijom i razgovorom upoznaju ljudi i steknu novi prijatelji.

Koji su vaši planovi za budućnost?

Ne volim baš nešto planirati unaprijed, trenutno sam na doktorskom studiju u Austriji i narednih nekoliko godina će tako ostati, a poslije ćemo vidjeti šta dalje. U svakom slučaju i u bilo kojoj opciji, plan je Sarajevo, Bosna i Hercegovina, meni drugo mjesto za život ne treba, a za posao ćemo se snaći.

Koju biste poruku poslali učenicima?

U životu će biti uspona i padova, ali slijedite svoje snove. Biće loše, a i onih fenomenalno urađenih ispita, što ne treba da vas brine. Nemojte nikad dozvoliti da neko bira i odlučuje umjesto vas, jer u životu je danas privilegija biti ono što jesi. Nemojte tako lahko odustati od ove države i ovog grada, jer Sarajevo i Bosna imaju "ono nešto" što nigdje drugo nema, ja sam se u to uvjerio bezbroj puta. Iskoristite svaku priliku da upoznate nekog novog, jer nikad ne znate, možda ta osoba promijeni vaš život u vrlo kratkom vremenu.

Anel Tahirbegović, bivši učenik i profesor

Radim svoj posao i ne doživljam ga kao obavezu, već kao manifestaciju ljubavi, zato što kreiram nastavne sate uz učenike kao što je bio Anel Tahirbegović. Ovaj posao je misija u koju imam povjerenja jer učenici koji su pošli u potragu za svojim snovima, ostvarujući ih vraćaju se Trećoj gimnaziji i radost uspjeha dijele sa nama puni zahvalnosti.

Edina Hodžić, profesorica

Edin Đapo: "Učenje postaje smisleno tek kada počnemo učiti iz radoznalosti"

U petak, 26. aprila 2019. godine u STEM-kabinetu održano je predavanje bivšeg učenika Edvina Đape koji je srednjoškolske klupe napustio prije dvije godine. Prisustvovali su učenici prvog i drugog razreda i profesorice Aida Burak i Alisa Ramić.

Edvin Đapo je uspješni student Univerziteta u Beču, gdje studira fiziku. On je i bivši olimpijac – predstavnik Bosne i Hercegovine na Internacionalnoj olimpijadi iz fizike. Ovom prilikom je došao s učenicima podijeliti iskustva i pomoći im u vezi sa izborom profesionalne orijentacije. Nastojao je objasniti kolika je važnost pravilnog učenja, koliko se treba naporno raditi da bi postao uspješan naučnik ili olimpijac, te čime se sve učenici mogu baviti učeći i studirajući u STEM-području.

Također, naš predavač je savjetovao učenicima koju literaturu koristiti prilikom učenja fizike i matematike. Potcrtao je važnost druženja i razgovora s pametnim, inteligentnim i načitanim osobama koje imaju širok pogled na svijet i budućnost i da će takve osobe – vršnjake naći učestvujući u kampovima fizike i matematike, kao i na takmičenjima iz istih predmeta. Naveo je da učenje postaje smisleno tek kada počnemo učiti iz radoznalosti, a ne zbog ocjene ili potencijalno osvojenog mjesta na takmičenju.

Zahvaljujemo Edvinu Đapi na izdvojenom vremenu te na razgovoru i korisnim savjetima koje je podijelio s učenicima Treće gimnazije.

Alisa Ramić, profesorica



Najljepši period života

Prije šest godina, kao dječak pun snova i bujne mašte, kročio sam prvi put u Treću gimnaziju i nisam znao da će se svi ti snovi i maštanja nedugo potom i ostvariti. Sljedeće četiri godine bile su obilježene uzbuđenjem, znanjem, radom, novim iskustvima i dobrom zabavom. U školskim klupama stekao sam prijatelje za čitav život i uspio postići sve što sam naumio, uz veliku podršku profesora i osoblja. Vjera i ukazano povjerenje od škole i prijatelja je bila jedan od ključnih faktora mog uspjeha i ponosan sam što sam bio dio jedne lijepo priče koja još traje. Vrijeme provedeno u Trećoj uvijek će biti jedan od najljepših perioda života, period u kojem sam odrastao i postavio temelje svemu što slijedi.

IV₁

“2033”

Za sve vas koji se sa čežnjom u oku sjećate srednjoškolskih dana. Ovo je istinita priča. Uvodim vas u novu realnost. Nakon što sam vas naučila da upravljate vremeplovom, dala sam vam moć da budete posmatrač i svjedok budućnosti učenika IV1 Treće gimnazije, Mrtvog mora i Spavača. Zalupila sam vratima vremeplova, poželjela vam sreću, okrenula se i nestala. Kanita Salković, nakon što je završila Ekonomski fakultet u Hrvatskoj, vraća se u rodno Sarajevo kako bi ostvarila svoju najveću želju. Hodajući sarajevskom kaldrmom i udišući, njoj već skoro zaboravljeni, miris sarajevskog proljeća, iz džepa vadi ključeve svog restorana “2033”. Davno zaboravljeni chat na messengeru razreda IV₁ je obnovljen, te su svih 25 učenika na anketu “Četrnaesta godišnjica mature Restoranu 2033” dala potvrđan odgovor. Pored učenika, Anela Coković je poslala još dvije poruke. Poruke si našle put do naše stare, no nezaboravljene, razrednice Šejle Brkić-Delalić i naše nove, no nimalo manje drage, razrednice Mirhe Fejzić. U srijedu, 8. juna 2033. godine, već u rano jutro u Kanitinom restoranu je već sve bilo spremno. U prostoriju su ušle Nira Arapović i Adna Junuzović. Nakon završenog Menadžmenta u Pragu, Nira je otvorila firmu koja je uspješno poslovala, ali nešto joj je ipak nedostajalo. Izgleda Sarajevo... Na konkurs se prijavila Adna, a iznenađenje je bilo obostrano, no ono brzo prođe, a partnerstvo potraja punih pet godina. Ležerno otvara vrata Emina Adilović, stručnjak za diplomatske odnose sa ljudima širom Evrope. Te odmah iza nje u resatoran upada Kolar Džeja, sa već novim stavom, stavom pobjednika. Vrata restorana otvara Sadin Šehović, uspješni stomatolog, nasljednik ordinacije svojih roditelja, i dalje fin, i dalje smotan, i dalje neostvoreni košarkaš. Glave svih prisutnih u restoranu se odjednom okreću ka prozoru, te svima oči zastaju na bijelom Mercedesu njemačkih tablica. Odmah smo znali da je to Ishak Kurtić. Kad je sljedeći put zazvonilo zvonce, u restoran je ušla, lično, balkanska estrada, Amar Bajramović, zvani AMCHE. U restoran, žaleći se na sve živo, ulijeće glavom i bradom, Haris Cama. Neostvoreni informatičar, brakorazvodni advokat. u polubijesu ubjeđuje svoju klijenticu da ne smije tražiti ništa manje od pola stečenog imetka i polovicu novca od dotičnog supruga. Camina, da ne kažem Harisova jer se ne bi odazvao, klijentica koju zasigurno poznajete je Sabrina Pirija. Tu je jer se razvodi od supruga. Nakon trzaja svih lica u restoranu vrata otvara Farah Šunje. Ona je poznata aktivistica i predsjednica humanitarne organizacije koju je otvorila sa suprugom. Sa Farah je došla i Asija Aginčić, vrsna arhitektica, Lamijina kolegica, i dizajnerica čiji je rad nadaleko poznat. Alica Muminović i Zana Fako se nikada nisu razdvojile, ali kako je svima bilo iznenađujuće, izabrale su nečekivan stil života. Obje su došle kao divne mame, gurajući u kolicima svoje dvije djevojčice koje će također biti najbolje prijateljice. Nadja Paranos je u Sarajevu razvila biznis, kupila je Slogu i napravila od nje najbolji klub u BiH. Sada zajedno sa svojim suprugom organizuje najbolje partije u gradu svakog petka, dok četvrtkom Murati Hamza i Ismihana Konjhodžić nastupaju zajedno. Ivan Bošković kao umjetnik koji je navikao da dolazi bez najave, unio nam je dašak svog zanimanja i dodao neobičnu umjetničku notu začina mirisu, sad već prepečenog krompira.. Tarik Čordalija je sada već uspješni youtuber, te je uspio nakon jedne decenije da skupi 14 miliona pratitelja. Mak Hasanović je, ipak, nešto malo drugačije od ostalih, nakon časova filozofije pronašao sebe kao idealistu. Otišao je u Prag i radi na Karlovom mostu kao karikaturista.

Svjetla se pogasiše i odjednom ispred nas otvorilo se platno. Veliko, bijelo platno spusti se preko kamenog zida restorana i prezentacija poče. Bio je to obrađeni slide show Ajdina Polića, fotografa našeg razreda. Prepečeni krompir je izgorio. Vrijeme je prošlo. Vremeplov je nestao. Više nemaš moć. Ne znaš upravljati. Veliko zvono čekamo. Popravljamo prosjek. Upoznajemo se. Upisujemo srednju školu. Završavamo osnovnu školu. Upisujemo se u osnovnu školu. Izlazimo iz vrtića. Učimo da govorimo. Slave naše rođenje. Ne postojimo.

Vrijeme brzo prolazi, trgni se!

Asija Aginčić i Džeja Kolar

IV₂



Svrtili ste u moj život kao slučajni prolaznici,
a zavoljeh vas ko nedjelja vojnika i vojnik nju,
pismo i džep pun slika.
Ostavljam vam svoju matursku jer nemadoh ništa drugo.
Čija je ono jedinica, ljepša nego petica?
Ono je iz francuskog jedinica što mi leži kraj srca.
Ako tražiš nekoga, nekoga za padanje,
onda Karlo je čovjek za tebe.
Ja nisam ona sto bi na prvi čas ustala,
a znaš da fizika je samo korak do ludila, a ti,
ti mi neopravdane nudio,
a ti primjerno u zaborav pretvorio...
I sad naprijed-nazad nemam gdje,
moja svjedodžba očajna je.
Još mi neće mi neće formula na oči,
ali me đonovi hoće baš,
a ja sam gas do daske dao
i više nemam šta da dam
kad vidi profa da sam varo
kajat ću se znam.
A ti drska ženo plava poludjela mi glava

ajde daj mi dvojku samo.
Poslije zvučnog signala
k'o da je s Bjelava
čujem svoju direktoricu Senadu.
Ali eto završi se i to čudo,
prođe vrijeme ludo.
Onaj prvi poljubac davno zaboravljen,
prvi dernek ko zna gdje je,
zagrli me i tiho se privuci da mi suzu ne vide.
I smijeh i pjesma i suze
ne bih vas izdala krv da mi puste.
Iste smo snove sve sanjali
rame uz rame uvijek smo stali.
I kad dođu teški dani,
kad odu svi jarani
i kad zamiširu jorgovani
znaj da niko te nikad voljeti neće
k'o što te volim ja.
IV2, IV2 ljepoto moga sna.
Skr skr
Bulje bulje bulje

IV₃

Moj najgori IV₃

Tihim koracima smo ušli u našu Treću. Kao djeca koja tek trebaju pronaći sebe. Nismo znali s čime ćemo se susresti u hodnicima, na klupama i kantini našeg novog doma sljedeće 4 godine. Kao da je jučer bilo, išla sam upoznati ljude koji će mi sljedeće dvije godine uljepšavati svaki školski dan, a sada sa suzama u očima najboljoj ekipi pišem oproštajno pismo. Odakle da počnem, razrede moj? Kako da na papir prenesem svaku emociju, događaj koji me veže za vas? Kako?

Bili smo glavna tema redovnih i vanrednih sjednica. Kažu da smo pokušali biti gori od svih prethodnih, ali to nije bio naš cilj. Bili smo svoji zato smo i bili najgori. Svi su nas kritikovali. Za sve smo i mi pronalazili mane osim, naravno, matematike. Učimo, ali nedovoljno. Učimo kamapanjski i zato se teško navuče 40 bodova.

Da su nas svijetom tražili, ne bi nas bolje spojili. Držimo rekord u broju perspektivnih, u broju izostanaka sa časova bez razloga i, naravno, 2.045 izostanaka u trećem razredu. Pokušajte nas nadmašiti!

Vežu nas mnoge uspomene za srednjoškolsko obrazovanje, ali preferiramo dane Valentinova. Očekujemo pismo simpatije da bi nas prilikom podjele dočekalo ono najgore, anonimno.

Kažu da je ljubav smisao života. Mislim da je i mnogo više od toga. Koliko dana provodimo misleći o svojoj simpatiji. Da li će nas pogledati kada se sretne na hodniku ili će skrenuti pogled. Onda slijedi beskonačno dosađivanje najboljim drugaricama i smišljanje novog „slučajnog“ susreta. Svako od nas je tragao za nekim ko će pružiti ljubav, ali rijetki su je istinski pronašli. Koliko god bilo svađa, uvijek se na kraju vratimo onome ko je bio uz nas kada su svi okrenuli leđa. Najljepša je gimnazijska ljubav!

Hvala ti, Treća, što si nas spojila! Što smo uvijek pokušavali jedni drugima navući ocjenu više i bili tu jedni za druge kada je bilo najteže. Da nam je bilo lako, baš i nije. Dok su svi barem jednom pobjeđivali na Decembarskim danima, mi smo uvijek bili diskvalifikovani zbog prekoračenja vremena. Žao mi je, Treća, ostala si uskraćena za najbolje pobjednike. Niko do sada projekat „Građanin“ koji se radi dva mjeseca nije uspio uraditi za samo pet minuta. Naučili smo o ratovima, broju ovaca u Australiji i funkcijama. Vremenom će možda to znanje izbljedjeti, ali ono što će ostati u sjećanju jeste „farbanje“ roditelja, snalažljivost u prepisivanju i odgađanju testova.

Okavo je izgledao naš sastav od 31 učenika:

Smijemo li početi redom ili će nas Abaza kritikovati što ga nesreća slova A i broja jedan u dnevniku prati i u oproštajnom pismu? Ipak, počet ćemo od našeg razrednika kao vođe ove naše bande. Znamo da Vam je krivo što se rastajete od nas koliko god Vi govorili da to nije tako. Nama će nedostajati priče iz Vaše biografije, uvijek smo ih pažljivo slušali. Najmlađi, ali i najluđi Rej Karabeg. Nije bio čest u školskim učionicama, ali trudio se svaki dolazak obilježiti i uljepšati nam dan šalama. Ne možemo nastaviti a da ne spomenemo njegovog najboljeg prijatelja Mirzu Imamovića koji se trudio Rejev izostanak nadopunjavati šalama i uspio je u tome svakog puta. Pored toga, za nas su Rej i Mirza slika prijateljstva koja će trajati cijeli život. Svaku generaciju Treće gimnazije krasila je barem jedna princeza, mi imamo takve dvije. Svakodnevno su izgledale kao da se šetaju ulicama Milana, u naš razred unosile su najnovije kako modne trendove tako i najaktuelnije priče iz hodnika.

Nije ekipa ako nemamo barem jednog pjevača koji će uljepšavati vrijeme vožnje autobusom. To je bio Ervin Vladić, najbolji vokal našeg razreda, ali i najbolji glumac koji je znao svakog profesora imitirati. Iako mnogi kažu da su rijetki slučajevi kada srednjoškolska ljubav nastavi nakon završetka škole, sigurni smo da slučaj iz našeg razreda neće tako završiti. Svakog dana smo uživali i divili se ljubavi koju osjećaju Aid i Hana jedno prema drugome. Uz to što smo najbolja ekipa u generaciji, mi smo i najljepši razred koji ima misicu Aminu Hasanbegović.

Naš razred krasili su i blizanci Vedad i Adna, koji su uloge brata i sestre mijenjali po potrebi. Adna je bila tu da bude glas razuma u porodici Borovac, dok je Vedad nasmijavao razred svojim izjavama koje i ponekad ni njemu nisu bile smiješne. Sasvim normalna pojava je bila da njih dvoje iz iste kuće dođu u školu u različito vrijeme. Adnino objašnjenje je bilo „Ma, dok on ustane iz kreveta, ne mogu ja njega čekati“, dok bi Vedad na to sve dodao „A zar je Adna uopšte došla u školu?“

Pravi primjer kako se suprotnosti privlače su bile Asja i Alma. Asjin misteriozni pogled i slatki smijeh koji nije ostavljao nikoga ravnodušnim je zaista ostavio niz i dalje neodgovoreni pitanja. Alma, nadam se da ćeš nas pamtiti po lijepim stvarima i pored neslanih šala, ali zapamti da se takve šale odnose samo na ljude koji su voljeni jer se zna da će ih razumjeti.

Osobu koju ćemo svi respektovati do kraja života je naš Amar Lukovac, koji je savršeno ukomponovao teške treninge sa školskim obavezama. IV3 je jedna manja džungla, a ti si naš lav.

Anese, hvala ti što si nas nasmijavao svojim uzdasima kada god bi te neko prozvao pred tablu. Ti znaš rješenje zadatka, samo ti je mrsko ustati.

Kada pitaju ko je najveći mangup, mislim da je bez razmišljanja odgovor - Edin Đonko. Njemu nije problem ni sam na dvadesetoricu, posebno ako treba braniti razred koji će sigurno pamtiti.

Dino Hrapo duguje zahvalu razrednim fudbalskim ekipama jer smo od njega napravili vrsnog golmana na kojega smo se na kraju oslanjali kao zadnju liniju odbrane.

Vjerovatno se uvijek neko zapitao kako izgleda dobar predsjednik. Nama je sinonim – Džejna. Skinuta je sa vlasti jer se borila za raju. Odlučna u svojim namjerama i čvrstog stava, nije samo slala vibraciju dobrog predsjednika, nego i zrele žene.

Erdine Šabotiću, hvala ti što si nam srozao ugled ne napravivši niti jedan izostanak u ove četiri godine školovanja.

Šta reći za Edina Kovača, osim toga da je jedna od najkreativnijih osoba u razredu, iako nijedna njegova ideja nema smisla. Hvala ti za ove godine čistog i iskrenog smijanja i najboljih fiks-ideja.

Složit ćete se sa mnom kada kažem da titulu najveće legende u razredu, i pored ogromne konkurencije, zasluženio dobija Eman Jahić, hvala ti za definitivno najbolje provale koje smo ikada čuli.

Kada nam dođe posjeta iz uprave u razred, zna se čiji glas jedini može doprijeti do njih. I uprava odmah zna da se to čuje Amer Voljevića.

Našeg Šošeta će najviše zapamtiti kuharice iz kantine, kolutanje očima je neizbježno kada dobiju posebnu narudžbu hamburgera samo sa mesom.

Najslađa beba našeg razreda i najveći izvor informacija o zadacima iz matematike koji će nam doći idući čas, naša je Emina. Nadamo se da si naučila da je opasno preskakati balkone i da se ne isplati bacati opravdanje u liftu.

Ne možemo ni bez Ines koja uvijek kasni jer je bila na treningu. Zaradila je svačije poštovanje igrajući za prvi tim najtrofejnijeg ženskog kluba u državi, a pored toga također odličnim uspjehom i ispunjavanjem školskih obaveza.

Kako zamisliti dan bez Jarebine poruke na razrednoj grupi, „Kasnim, nemojte da me upišu.“ Osoba do koje su rijetki uspjeli da dopru, a ovi koji nisu, napuštaju školu noseći se sa tim da vjerovatno nikada neće uspjeti.

Juliane, možda ti nismo mogli obećati da ćeš igrati svaki put kad se presvučeš na sportu, čekaj nas u Brisbaneu, dolazimo ti svi na ljetovanje, to ti je obećanje.

U glavi će mi cijeli život odzvanjati različiti glasovi koji govore isto „Lejla, upali hotspot“. Pamtićemo je i po prepoznatljivom kolutanju očima svaki put kada se spomene klub MyFace i onda kada spominjanje kluba nije posvećeno njoj.

Nešto najbliže superheroju što imamo u razredu je Nermin Golić, a pored te laskave titule okitio se i titulom uzornog učenika, iako ju je sam sebi dodijelio. Kome je još profesorica Javorka povjerila ključeve od auta osim Tariku Panjeti, najboljem matematičaru sa ocjenom odličan 2. Također, pored velike konkurencije, Tarik se okitio i titulom najboljeg vozača u razredu.

Hana Ećo, većina raje će te pamtiti po lijepoj priči o srednjoškolskoj ljubavi, usko s tim povezana je i titula najkreativnije osobe u razredu koja je neprikosnovena u smišljanju najboljih izlazaka.

A tu je Mirza Abaza, možda ne najmlađi po godinama, ali uvijek je pravi silly boy. Drugačiji od svih i uvijek raspoložen za jedan govor o superherojima. Kada na sportu fali vode, on je glavni jer je u koljenu ima i previše.

Poseban kutak u našem srcu uzela je Lamija Džaferović. Šta će budućnost donijeti, to ne znamo, razred će te pamtiti po najlošijim provalama sa kojima si zaradila najveći broj ironičnih osmijeha. Pozitivnom energijom koju prenosiš na ostale, hvala ti što si se postavila tako da je nemoguće ne voljeti te. Vjerovatno su se svi naslušali svakakvih izgovora kada se treba odgovarati, ali složit ćete se sa mnom da su dva najbolja „Tetka mi je imala saobraćajnu nesreću“ i „Ja učio za internu evaluaciju iz demokratije pa nisam stigao.“ Oba su prošla, a i oba pripadaju Aidu Deliću.

Hvala vam na svemu za ove nezaboravne dvije godine, na zajedničkim trenucima koji će zauvijek ostati u mom srcu. Falit će mi svaki momenat proveden s vama u prostorijama Treće gimnazije. Svima želim sreću i uspjeh u budućnosti, da ostvarite svoje ciljeve i do kraja života ostanete posebni kao što ste i do sada bili.

Posebni i komplikovani napuštamo hodnike u koje smo tiho kročili. Ipak, nećemo ih tiho i napustiti. Pošto je gužva u šesnaestercu, sjest ćemo na volej i zadnji put zapjevati

“Jedan život malo je, krenimo do obale!”

Ines Ružić i Mirza Abaza

IV₄

Fragilis (lat. fragilis- lako lomljiv, krhak)

Miris kafe podsjeća me na taj sivi dan. Kiša je sipila i rasipala svoju melanholiju po stanovnicima našeg grada. Oni su negdje žurili i bježali od nje dok sam ih krišom oka posmatrala. Danas moja generacija nigdje ne kasni, razmišljala sam. Cijeli ovaj dan smo ustvari mi i sve u njemu je naše. Nalazimo se u dvorištu čiji svaki čošak poznamo. Zagušeno je i bučno, ali svejedno dišemo punim plućima. Čujem muziku i osjećam kako mi kroz tijelo prolaze trnci uzbuđenja koji me šakalijaju. Samo deset sekundi dijeli me od nekog nepoznatog svijeta prema kojem koračam. Posljedni put se osvrćem preko ramena da vidim šta napuštam.

DESET, DEVET...

Gužva je, kao i uvijek. Jurcam hodnikom, zbunjena, u vlastitim mislima. Razmišljam o riječima profesora, znanju koje nam je prenio i osjećam blagi ponos zbog toga. U misli mi naviru i očeve riječi koji mi je sa toliko ljubavi pričao o znanju. „To je jedino što je samo tvoje i što ti niko ne može oteti.“ Tada sam se djetinje smiješila i blago klimala glavom, ali danas razumijem značenje njegovih riječi. Sa znanjem nikada neću biti ogoljena do kože niti prazna, jer ono je sada ja koliko i moj krvotok.

OSAM, SEDAM...

Tu me prekida hihot drugarice koja iza mene korača stepenicama. Posmatram nju i ruku koja ju je obgrlila i osjećam da i samim pogledom kradem dio njihove intime. Ali njih nije briga za mene, jer u tom trenutku oni nisu u školi, na stepenicama, već u dubokom prostranstvu zjenica kojima se gledaju. I osjećam se zahvalno što se grizem o kolač njihove ljubavi i topline.

ŠEST, PET...

Sada, sa lijeve strane me rastrese slučajni dodir hladne ruke. Ništa ne govori niti osjeća moj pogled na sebi. Otuđena, pati dostojanstveno sve dok neko svojim bezazlenim ispadom otme joj taj prepoznatljivi ponos. Tada nas sve grli rukama idalje hladnim, ali to nema veze jer od njenih očiju osjećamo rumen u obrazima.

ČETIRI, TRI...

Svi hodamo to tim stepenicama koje nam toliko dugo lome noge. Navikli smo više na to pa je uobičajeno da dok smo tu misli lutaju po svjetovima koji još nisu ni otkriveni. Rame uz rame, različito proživljavamo isti dan. U svakome od nas je jedna posebna iskra koja se iznova i iznova rađa poput feniksa. Ne, nismo mi dugo proveli na tom stepeništu. Nije naš put bio u nogama, već u glavi, kao i svaki drugi.

DVA, JEDAN.

Vrisak mojih vršnjaka budi me i vraća u ovaj jedinstveni trenutak. Ispred škole sam. Gledam sve te, do juče dječake, a sada već momke čija ramena su dovoljno široka za svaki teret. Razrasli su se toliko da mekom kosom dodiruju probearalo granje. Osjećam snagu i u svom krhkom tijelu. Malo je dvorište naše škole za svu energiju koja nam grije unutrašnjost, ali ipak to mjesto je sada naše i ničije drugo. Mi smo ti kojima je danas sve oprošteno i dozvoljeno. Prodisali smo bez težine u prsima. Smijemo se čistoj sreći koja se spustila na nas umjesto kiše.

Odrast ćemo, svi do jednoga. Bit ćemo očevi i majke, profesori i doktori, tužni i sretni, ali danas to je sporedno, nije bitno i ne trebamo pomišljati na to. Jer danas, mi smo još samo djeca koja se suprotstavljaju jednom običnom sumornom danu.

Senija Kaleta, IV₄

IV₅



Kada se jedna vrata zatvore, druga se otvore. Jedno doba našeg života se završava, a drugo počinje. Uživali smo u svakom trenutku srednjoškolskog školovanja. Dani su nam prolazili ispunjeni smijehom i razigranošću.

Trideset i dvije osobe IV5 držale su se uvijek zajedno, bile kao jedno.

Sve što je lijepo, kratko traje, pa smo tako i mi došli do kraja našeg gimnazijskog obrazovanja. Trudili smo se postizati što više, sticati znanja, razvijati vještine i kompetencije, onako kako smo najbolje znali. Ali smo se trudili i biti dobri ljudi, pomagati jedni drugima, biti jedno biće. Prisjećamo se raznih situacija iz našeg gimnazijskog života, onih lijepih i pozitivnih, ali i onih ne tako slavnih.

Pamtićemo druženja, zajedničke projekte, putovanja, ekskurziju. Pamtićemo profesore koji su nam davali podršku, razumjeli nas, podsticali i izvlačili ono najbolje iz nas. Gotovo svi. Pohranićemo sve drage uspomene na server koji se zove životni put, fajn Treća gimnazija. I kad god poželimo, oživjećemo ih ponovo, uvijek sa radošću i pomalo sjetom. Jer naša su sjećanja prožeta obiljem ljubavi i drugarstva koje smo pružali jedni drugima. Najviše je bilo sretnih dana, kada se svi smijemo, zezamo, pomažemo jedni drugima. I onda, kada je bilo teških dana, znali smo da prolazimo kroz jedan lijep dio života. Jer, najljepši su srednjoškolski dani.

Profesori, vi nas pamтите samo po dobrim i pozitivnim stvarima, a one naše sitne nestašluke zaboravite. Pamтите kao dobar, složan razred dobronamjernih i vrijednih učenika.

Putevi nam se razilaze, svi pratimo svoje želje, idemo ka odredenom cilju.

Upis na fakultet je novo poglavlje u životu, novo razdoblje za svakog učenika. Potvrda njegovih zalaganja i sposobnosti, dokaz istrajnosti na putu vlastite afirmacije i životnog cilja.

Stojeći na raskršnici jednog dijela životnog puta, sretni smo i ponosni, na trenutak pomalo i uplašeni i zbunjeni, ali, sa druge strane, radosni i optimistični, jer nosimo sa sobom ono najvrijednije što imamo - znanje koje su nam, uz naše veliko zalaganje, omogućili naši profesori i naša Treća gimnazija. Zahvaljujući i vama, nosimo svoj mozaik znanja, u koji ste svi vi ugradili po jedan kamenčić. Nije bilo lako, ali zato smo sada tu gdje jesmo, ponosni i samouvjereni.

Našoj razrednici, Aidi Ražanici, bili smo prva generacija. Sigurni smo da će nas pamtiti i uvijek nas se rado sjećati. Možda čak i pričati neke naše zgone budućim generacijama. A mi? Mi ćemo nju ponijeti u srcu, jer ona je bila dio nas. Ne kao profesor, ne kao razrednik, već kao čovjek i prijatelj.

Govorimo zbogom Trećoj gimnaziji, sa osmijehom izlazimo iz nje, ponosni i sretni što jedni duge znamo.

Hvala Ti, školo, što si me upoznala sa divnim ljudima, sa prijateljima koje ću imati za cijeli život. Gdje god nas putevi odnesu, uvijek ćemo se vraćati jedni drugima. Jer naše veze su čvrste i neraskidive.

IV₆

Veliko zvono, kraj, odlaze maturanti, čuju se uzbuđeni glasovi. I sreća i tuga, sve zajedno, svi zajedno. Evo, četvrta godina prođe, a kao da smo jučer kročili puni straha i nesigurnosti u naš sada topli dom, Treću gimnaziju, a već je vrijeme da idemo. Pozitivna energija i odlično okruženje koje nam je ponudila škola, vremenom su postali naša mirna luka, zlatna sredina u ovom ludom vremenu. Gledajući slike svih naših projekata, druženja, putovanja i svih uspjeha, uspomene naviru. Mi prirodnjaci posebno smo voljeli da glumimo i amfiteatar nam je postao više od bine i klupa za publiku - postao je jedna kreativna zona u kojoj smo otkrivali talente i dali sebi za pravo da budemo umjetnici. Teško je odlučiti jesmo li bili bolji glumci ili hemičari. Kako god, naši srednjoškolski dani bili su obojeni smijehom i dobrom energijom, uz pismene iz matematike i fizike u istoj sedmici, naravno. Teško je spomenuti sve, jer je uspomena mnogo, ali svako sjećanje zastaje poput knedle u grlu. Sjećanje, tako mala riječ, a tako bolna i snažna. Sada smo na prekretnici života i na nama je velika odgovornost ući u novi, nepoznati svijet, sigurno turbulentniji od Shambale u Port Aventuri. Ah, ipak, nećemo pričati o ekskurziji. Ono što se desi u Španiji ostane u Španiji. Šalu na stranu, tih deset dana zaista jeste najljepše iskustvo koje jedan srednjoškolac ima priliku doživjeti. To je putovanje koje će sigurno svako od nas vječno pamtiti, kako po sunčanoj Veneciji i dinamičnoj Barceloni, tako i po noćnom provodu u Tropicisu.

Naravno, nije sve bilo bajno. Mnogo je tu neprospavanih noći, straha od testova, želje za što boljim postignućem, ali sve je to prošlo i iza nas stvorivši nas osobama koje smo danas. Proživjeli i preživjeli... baš kao i slogan na majicama, koji zaokružuje iskustvo nas prirodnjaka. A sada je vrijeme je za nove učenike, sigurno jednako preplašene kao i mi prvog septembra 2015, a koji će za četiri godine biti zahvalni za sve ono što im je ova škola pružila.

Treća gimnazijo, hvala ti što si nas krunisala životnim znanjem i iskustvom koje je od nas kreiralo dovoljno jake ličnosti spremne da se dalje bore za sebe i kroje svoj put. A tvoji učenici će ti se vraćati kako na Dane otvorenih vrata kada u proljeće škola procvjeta, tako i u svojim sjećanjima.

A sada, adio!

Tarik Jelačić, Maida Redžović IV₆

Oni su ponos generacije 2015 - 2019.



Učenci koji su tokom četverogodišnjeg školovanja imali odličan uspjeh (5,0) i primjerno vladanje:



Selma Spahić, IV₂
Melika Đulančić, IV₄
Ashar Hajdarević, IV₄
Senija Kaleta, IV₄
Elma Leka, IV₄

Ajna Mušić, IV₄
Adna Salković, IV₄
Igor Zarić, IV₅
Nikolina Pokrajac, IV₆
Tarik Jelačić, IV₆

Adisa Čengić, IV₆
Emina Mašić, IV₆
Hana Talundžić, IV₆

Veliko zvono







LIST IZDAJE NOVINARSKO-FOTOGRAFSKA SEKCIJA

VODITELJICE NOVINARSKO-FOTOGRAFSKE SEKCIJE

Dženana Nezirević i Senada Turajlić,
profesorice Bosanskog jezika i književnosti / Hrvatskog jezika i književnosti / Srpskog jezika i književnosti

GLAVNA I ODGOVORNA UREDNICA

Senada Salihović, direktorica Treće gimnazije

REDAKCIJA

Amel Jašarević, Ajna Đapo, Esmā Junuzović, Nađa Osmanagić, Mirza Bakal, Hana Salom, Ema Selimović,
Tajra Osmanagić, Amila Gabela, Meliha Kasapović, Arnela Obralića, Zerina Osmić, Abela Rastoder,
Amina Huko, Ajdin Polić, Tea Dedić, Alisa Bjelonja, Nura Džanko, Amra Koldžić,
Ema Čatić, Zerina Omerbašić i Helena Bogdanović

LEKTURA I KOMPJUTERSKA OBRADA

Dženana Nezirević i Senada Turajlić

GRAFIČKI DIZAJN I DTP

Fadil Pleho

ŠTAMPA

Tipografija d.o.o. Sarajevo

Tel.: 033/238-489

E-mail: tipografija.sarajevo@gmail.com



ADRESA REDAKCIJE

Treća gimnazija, Vilsonovo šetalište 16, Sarajevo

Tel./Fax: 033/724-500

E-mail: info@treca-gimnazija.edu.ba

Web: www.treca-gimnazija.edu.ba



Sarajevo, juni 2019.

